

金陵朱氏家藏

利



江村集

金陵朱松年

校長撰

子繪江村圖戴樛園以詩見贈因和其韻

此身宜置最高樓小築江干景物幽雨霽插秧看戴笠月明攜酒快登樓窗中  
岫列嵐光滿天外帆飛樹影淨為謝紅塵奔走客柴門那得貯閒愁  
怒潮風雨雪山催巨艦艖瞳目浪開擊楫幾人驚壯志乘槎何客負仙才心從  
競處都無用機到忘時始不猜何似一尊樓上坐任他鷗鷺自飛來

燕磯

燕磯天險鎮江流鶴唳亭臯竦十洲不管興亡山自在千家村火泊漁舟

花巖

數聲清磬法融堂郭外烟雲直大荒贏得石谿能潑墨高樓百尺染江光

題葉慎之茂才小照

只在蘆花淺水邊閒將漁櫂酌江泉長風莫載茶鐙去吹散騰波一縷烟

江村集

自箴

矜乃敗德謙為福基立身之的幹事之師

伯祖父校長公諱松年一字眉長師晦公長子也受書於沈道初府庠廩  
生性仁孝幼失恃事繼母甚謹食未奉母者不敢嘗大功諸父兄弟昏喪  
大事皆身任之餘盛德事載公墓誌銘中雍正辛亥年四十六葬鍾山  
紅馬羣公嘗繪江村圖與戴樛園潛倡和曰江村集子諱瀾清河道孫紹  
曾湖南布政使孫桂楨廣東巡撫贈公皆如其官道光庚子正月姪孫緒  
曾謹跋



朱雀橋邊野草卷一

金陵朱鶴年臯聞撰

迎

鑾頌恭序

欽惟

皇帝陛下

盛德光昭

深仁普被

布大公以包涵萬類

本至誠以兼總三才聲無外而宅心溥有形而歸景乾坤之撰合叅贊之化成

端拱則恭已無為

巡狩則俟人有慶

封禪則超乎七十二代

朱雀橋邊野草卷一

惠恤則浹乎億萬兆民陰陽和平神人嚮應聲教布獲洋溢天區此

大聖人所為蕩蕩巍巍彬彬郁郁體乾元之始司造化之權德厚而福昌功崇

而業廣萬方共樂春臺萬世咸登治宇者也臣籍密荒遐越在東粵恭聞我

皇上御極之十六年

宸衷宥密蠲潔齋明

詔告中外

巡歷江浙以

敬恭于會稽之山於是建

辰旒正

法服撫

玉輅職

龍舟肅仰舞合雲和踰泰岱而山靈弭節度黃淮而河伯安流呵護者百神共

球者萬國貴賞自出庫帑絲粟不煩閭閻普大而南引領以望古所稱來游來



歌矢其音以休以助傳于諺者今日果見之矣臣行賤志愚叨被矜佩遙與風聲之動益切

雲日之瞻迺沿海遡江涉灘陟嶺不遠五千里之路以近

聖天子之光竊見大江南北之間猶夫百粵東西之象土農勸耕讀工賈安肆間老幼鼓腹以含哺婦女勤饋以工織熙熙然平成之治皞皞乎雍動之時也顧梅柳知春禽魚向暖呈瑞者菌芝之性欣榮者草木之心時鳥引吭候蟲鼓翼皆含和而吐氣亦應律而發音雖山岳不以土壤高河漢不以涓流大臣竊自少習古詩而無由振其微響茲值

華祝高呼之會實爲千載一日之遭爰紀遠人之聞見敬美

聖德之形容作頌十有二章未敢附揚厲鋪張之末凡以見

聖皇握符循舉時巡之鉅典而薄海內外無有遐邇得慰其瞻

天仰

聖之思蓋有所由來誠非偶然者焉臣曷勝誠惶誠恐踴躍屏營之至謹序恭

朱雀橋邊野草卷一

頌以

上其頌曰

維

皇經世天敦其原川岳效靈以毓泰元乃

聖乃

神含光蘊靈肇建有德式命于九圍兆民攸賴一章

維

皇述法天宅其基

龍飛繼御雲行雨施

聖孝不匱

社

宗式憑之遵厥百度允執在茲二章

維



皇建極天贊其治一日一日萬幾思艱圖易惟敬作所受天之瑞三章

維

皇垂拱天廣其翼三公坐論六卿分職啟心沃心康功以卽嘉謨嘉猷惟我皇之德四章

維

皇作人天萃其英萬邦黎獻共惟

帝臣生賢靡有遺斯立斯舉勸相我

國家以彙征連其茹五章

維

皇懋官天克其知有猷有爲有守是用克舉之否則莫齒之心惟其實循良斯

取斯六章

維

皇揆文天縱其能心源旣接經術以蒸曰惟颺之罔弗賡之鐘呂是憑鸞鳳是

朱雀橋邊野草卷一

興而光而昌如日之升七章

維

皇神武天錫其威貳心咸革惟大化是歸有蠢小醜

廟算範其圍馮翼孝德成功魏巍八章

維

皇虔祀天格其馨煦煦其日穆穆其情

登封下禪大禮斯敘大樂斯賡呼

萬歲者三豈繫太室之聲九章

維

皇敬民天有其年惟稼穡之艱難民食其天蠲彼正供樂彼耕田出作入息康

衢擊壤稱

萬年之觴萬國用享十章

維



皇錫類天崇其孝

慈寧寢膳壽愷康劬朝暮之至三愉愉

輿權以天下養萬古伊教山容木華是靈是效十一章

維

皇歛福天廣其幅

軫念厥方

清問斯俗仁育不億豈曰東國惟東國民受

恩靡極乃補齊之耕載助晉之歛爰及吳越之農賈沐浴膏澤塗歌巷舞太平

有家日引月長

多富多壽多男子申錫無疆四表光被萬類化成惟曰欲至十萬年我

皇永承承用保民十二章

次趙方白韻題上杭趙明府集九飛鳥圖

超超鴻鵠姿翩翩鸞鳳儀托迹在寥廓發聲和天倪何為雙鳧化作此朱鳥遺

朱雀橋邊野草卷一

經年伏時夜太息潛青霞瞻彼山水客所快漁弋歸溪谷習舊心戀影仍深奇

多愛生憂患有得祛依隨筌蹄果能棄翔集從攸宜達人審世事高步遠世機

身與雲溟稱心與風塵際停躡想元著奮飛騰遐期逍遙和其光世網將焉施

李鏡江明府招遊報資寺

招提留舊遊勝事成追想勞生縛塵鞿幽尋闕清賞李侯發興新招攜極俯仰

花雨隨風翻榕陰入雲上福地靈源滋池光大方廣誰為說無生苔石秀可破

登樓湖空濶一海平似掌開襟納南薰長吟寄蒼莽

羊城送張相園司馬

送客珠江湄迴眺南溟溪巨浸滄炎藩寶藏壘海市歲課徵波鯨蕃法出柙咒

職司既加崇操縱將奚恃以君作楫才屢奏割雞技肅肅曠有攷躍躍體解起

徒議勤北征叢望改朝褫睠彼賓餞殷永念官守理一聚逾十年再聚別萬里

雲霞粲遙天景光麗高梓共期經術醇終要性命旨雅懷詎能抒三復澳門紀

相園善有  
澳門紀略



再送相園北行紆道歸省疊用柳州諸超師韻

落落吳公囊翩翩萊子服臨歧紛贈言藹如其可讀身與青雲俱心與白雲逐  
秉訓務宏通應物屏圓熟遙知質行藏歡顏動松竹君家衣冠崇再浴好再沐  
試看雙闕暉暉向東山足

瀧西留別白完劉生

甲戌講學西寧之甘棠書院自春迄夏相聚極歡閏月以家累暫返羊  
城行李已戒白完劉子持筆索書走筆致諸子云爾

瀧西玉枕山峯聳聳朝翠瀧西錦江水洄漩溢春媚我作瀧西遊好風在衣帔  
古棠蔭已深高翮集不墜有鳴諧蕭韶有飛垂飄飄際此時休明遣之應符瑞  
相看久忘言預料喜無寐對影欣奇賞離羣苦家累小別向海濤後期指麥穗  
分寸惜景光人天紛驚伺巍巍石渠顛樹立九瑰異願爲衆雄倡共舉靈秀翅  
次趙方白韻題集九明府杭川治事圖

天水先生經術醇雄飛子閭稱神君七峯徑深蔓香草三摺波迴滋綾紋宵柝  
不警戶不閉浮梁如虹商如芸遂令鬱葱彌佳氣常時林總羣吉雲舊遊茲地  
同新夢重來所見殊曩聞高揖琴堂傾懷抱匡坐蘭室將拳勲偶爲示圖恍示

朱雀橋邊野草卷一

五

掌始知治事如治軍不忘恭敬在退食每親部署下夜分庭階靜聞闌守肅鳳  
蕉清拂澹臺裙庖廚淡永樽理老梅香沁漆園饋歲月有會準古禮催科無  
勞敲撲勤律令素定行吾意簡書無煩文法紛君不見冬日夏日相旋照風骨  
將樹社稷勳

西江舟中贈別韓栗亭謝寄園兩孝廉

我愛韓夫子名侯短蓬促坐儼伏几窮經不息其息深抱解無言其言旨我愛

謝夫子名恒且吟且誦扁舟裏雄才懋學貢司成玉粹金昭稱國士筠門連袂

赴公車而與我遇章水瀝打頭北風雪撲面寸心內傾遣三餘度江春色上梅  
柳遙艤霜景迎沮洳千頃都陽一帆正贈言握手紛腳踏聚散各有數行行勿  
復顧造闌莫上宰相書宴園合應司徒賦名揚我是華顛人意氣未肯隨飛塵  
乘車下馬異時事相要不殊今日身



石門舟中同董浦御史湘門茂才彤文孝廉松軒孝日永處士作

無賴石門舟乘潮撼石尤驚波喧伏屋寒色上輕鷗樹暗江村社鐘荒野寺樓  
蒼涼問尋誰與湖靈洲

遊西寧龍井留題

龍井瀧西勝幽尋入翠蘿巒明春日蚤林動曉風多聽瀑清于磬觀源澹不波  
何緣依石壁指引客踪過

李鏡江明府同訪辛北村太史於蘭湖不值

載酒城西寺追涼訪客遲聊乘秋浦興來寫稼軒詞恨藉書千卷空明水半池  
樓高扇不啟何以遣炎曦

瀧西羅凌秋孝廉文昌閣登高以子赴甘棠諸子龍井之遊在詩見示次

韻奉酬

誰領重陽勝山樓秋景鮮錦鋪二徑菊堞擁一城煙關在縣城東鋪錦山麓酒氣清霜合  
歌聲爽籟傳高林憐旅雁翔集儘翩翩

朱雀橋邊野草卷一

乙亥初春富川逸莫學博區司訓蔣明經暨廖張柳汪毛蔣周諸茂才集

飲

不見七年久重逢俱老夫風塵荒舊緒書硯有新模戊辰薄遊後于今七年諸郎皆鶻起矣春入  
蒼山秀晴添古樹腴漫尋疇昔事且盡酒千壺

春江雨夜同湘門曾君

夜入江雲暖欲收閒聽飛雨亂更籌缸花歛饒迷煙水魚沫吹腥滿舵樓睡鴨  
聲喧新夢斷天桃香濕晚妝愁倚蓬共結晴天想怕泥尋春路似油

舟人餉茶果

偏是舟人慰客愁殷勤分餉賽盤稠辣茶渾點蒼黃豔粉果高堆雪白綵榕葉  
烟橫星照眼荻花風晚月當頭浮家無着堪回望何處春生海上洲

度嶺却寄

山靈鬚髯壯此行佳氣迎人鬱鬱生幾夜舞風盈耀雪一朝湧日滿輿晴深村  
梅放明霞影高谷冰垂暖玉聲重上嶺頭頻顧望浮家何事滯歸耕



豫章江上却寄劉斗田夫子仍次留別韻

過歸無計緩迴舟子以首夢接光風錯曉籌松菊徑閒雲半繞鯢鵬天澗水西流書傳弟子留三篋交許兒孫結九秋睽隔莫詢何所就壯心遙寄足相酬

天門山書懷同寄園孝廉用前明杜公浩壁間韻

一上天門動百懷壯濤終古激層鬼江分南北春無限梁跨東西雲與關新火乍明村晚樹宿鸞欲奮蟄深雷日邊有客留題去凝滯如今我更來

杭州贈軒潔夫淳江人

漳江夙望挹風騷握手重逢訝二毛瘴海帆迴浪靜雲山棲老碧梧高巖夫洋舳遂萬羊城峰頭作市身將隱灘頭題詩興自豪峰頭市及烏鶴頸灘皆奇絕樓臺從坐卧續紛香草佩青袍佳山水而潔夫行商於其間百叠

九日泛觴蒲澗同杭堇浦侍御何西池刺史湘門彤文椿軒松軒諸公限

韻

重陽何處攬朝曦秦客猶留菊徑存風雨氣收人跡冷茱萸香湛酒花渾高臺

朱雀橋邊野草卷一

七

鶴散千年響深澗蒲瀦九節痕廿載漫遊償勝賞商歌一曲動雲根

遊靈洲寺同杭堇浦侍御耿湘門王日永茂才馮彤文魏松軒孝廉修願

寺僧用壁間明直指李公時華吳公文華韻

嶺勢南馳海勢東靈洲山時水當中周遭寒碧沉溪藻厯亂遙丹落岸楓點染空江憑老衲彫願挽回荒蕪藉坡公寺又名小金山不知何始臺院聯額俱襲東坡金山詩中語地以人傳而幽勝亦多假借如此不勝遠思停柔櫓為放人天眼一空

查魯眉茂才招同杭堇浦侍御魏松軒孝廉暨同學諸子飲餞諸葛白巖

司馬遊吳門分三江韻

迷離穠色遍蠶江共度驅歌送畫艫楓葉在林紅點點沙鷗刷翅白雙雙空拚高卧留幽夢漫把新笏促玉缸好向寒山僧寺外聽鐘閒證海門幢

九日瀧西同張文學疑長黃子襄臣吳子昌玖袁子晉羣羅子九韶劉子

白完獻朝龍井山登高用杜少陵藍田崔氏山莊韻

瀧西賈所占高寬載酒同登盡客歡詩興爭豪題金字頂光自露脫危冠松欹



玉枕聲靜鳥息雲窩夕照寒漫把茶莫閒嗅卻如妝山色正宜看玉枕山雲窩寺皆瀧地

次范式南茂才山齋雨後韻

市畔園林雨外窗隔街縹緲散餘芳樓高常見山雲下門靜能教舍鳥忙蕉葉弄聲清旅夢荔枝含味沁詩腸不知獨坐凭欄處錦片苔茵有幾方

羅定舟中

三瀧地險出羣蠻一葦舟輕湖百盤箐嶺障天迷客路藤溪飛雨入漁竿火耕有土皆分佃木處無山不在官隔代經猷子載思浪遊豈直報平安羅旁係平置縣三瀧明韓忠肅公雍之所經理也

玖杯嶺九日作

玖杯崇嶺度重陽鴻影飛迥異常清籟在空舒坐嘯明霞如縷拂行囊風沙坪霽青萸澁潭洞谿深黃籜香客老秋高渾慣事題糕漫與問蒼涼

和宋晁叔用追昔詩次韻

朱雀橋邊野草卷一

八

惆悵春塵誤歲華門深似海阿誰家滿樓雲氣歲蕤籥小院風光豆蔻花賣鬻香勻偎鬢翠素衣暖慰貼身紗無端冷落三生約浪蕩天涯又海涯莫緣拋置舊鉛華回首春霄有故家玉鏡光寒愁獨影彩豪夢斷結空花噉桃瑤鳥飛青鳥繅繭靈泉續絳紗聞道蓬瀛近清淺栽桑休恨海無涯

信宜卽事

竇江清澈皓鸞飛葱鬱山城碧四圍箬簟鋪橋墟客過筠絲織嬌嫁人歸半牀紙被繁春夢千樹桃花笑素暉秋緒未應愁厄問東籬從不辨霜威

叢祠和許石泉妹丈

曠代荒祠掩碧虛輟耕誰與撥蘧蔭靈風曉拂牛羊跡游霧春蒙雉兔居散木當門堵瓦鼎野花上壁護蟲書歲時也有閒香火直把柴車作寶車

廢營

不丁閒營生古哀將軍壯蹟入寒灰殆聲夜散風聲在劍氣秋沉雨氣來彩纈繫爪曾塞井玉鞭試馬就平臺傷心百戰弓藏後又見桑麻遍壘栽



殘陽

傾曦光景尚矇矓石壁遙翻江水東  
戈戟雲酣三舍赤桑榆烟擁半樓紅  
誰家妝晚春山外一馬嘶驕野驛中正  
好留鶯度楊柳黃昏儘與語微風

初月

幾縷殘霞幾抹烟夜光一曲日光連  
簾垂鈞影雙雙下  
裘掩風痕欵欵眠碧海心蘇曾竊藥  
娥池波窄乍當筵教誰素手樓南指  
漏洩雲華半面圓

高州游潘茂名觀山道院

同王若愚葛文叔王靜岩用壁間韻

路轉高涼閒轉丹森森山色許閒觀  
石船載月光無定玉井含風液未乾  
橘柚香迷鋤藥徑桃榔影靜步虛壇  
我來欲附游仙籍自笑星星鬢似潘

化州石龍吟

颯颯西風海氣沉蒼涼獨唱石龍吟  
羅江滢瀾迴秋權竇嶺停雲動暮磴  
百尺亭臺珠客影州外驪珠臺人謂昔有客遺珠其下一樓鐘鼓橘人心樹近鐘鼓樓者進聞來遍訪

英雄蹟洗廟蕭森古道陰

朱雀橋邊野草卷一

題電白溫泉

南炎鬱鬱白州陰湧地泉温入寺深  
曲室潛凝仙液滑三時蒸澈玉磴沉  
沿淨滋草洵寒色繞岫生雲有熱心  
翻悵潔身慵向浴神湯儘與滌塵襟

題梅氏園林

滿船風雨乍炎天乘醉衝開半海烟  
自是梅家好花事傾資買盡素馨田  
鍾山

杳靄雲封百二重秦皇端不識蟠龍  
駁娑寒浸斜陽外猶見山前五里松

牛首

入門先上白雲梯絕壁樓臺鐵漢題  
平野遠從雙闕望松根穿透夕陽西  
攝山

夢遶樓霞四十年白雲遺老卧江天  
木魚聲響羣山寂未肯徘徊隔世緣

鳳皇臺

豈是青蓮昔日遊殘碑猶自卧林邱  
鳳皇去後梧桐謝何處江光一抹秋



寄題丹霞寺 有序

仁化縣丹霞山峰巒環峙溪水滌迴前無知之者明末流寇亂李樞輔  
永茂負母避難其上後以廬施金道隱為僧舍

中外崩分勝國悲有兒負母欲何之霞巒剩與行人望不改攀藤奉菽時  
誰遣孤臣削髮來宮陵望望已成灰海幢苦行丹霞老不與南華作一堆

湘子橋詞

湘子橋邊春信濃浮梁廿四駕春風要吹郎去隨郎住不啻郎身是轉蓬  
湘子

梁也水深石斷處  
鎮浮梁廿四鎮之

湘子橋邊春態妍雲鬟斜掠舞僊僊帆飛蝴蝶卸花落翠被生寒抱影眠  
潮船

五六片雜布茨草席為之  
御風而行栩栩然蝴蝶也

湘子橋邊春樹孤雲浮水急過謳湖無端惱亂桃花影甘露岩拋五色珠  
龜湖

岩別  
客處

湘子橋邊春緒柔山花兩岸接汀州千紅萬紫將心事分付東風送客舟

朱雀橋邊野草卷一

湘子橋邊春擢催離情宛轉罷離梧從拚身化仙人石立在江心待客來  
蔡家園下

有石與舟迎逆名為  
仙人能隨水浮沉云

湘子橋邊春水勻流來流去度青春憑君莫泊三河壩野漲無情柱滯人  
三河壩大

埔地衆  
水所匯

沒硯洲

江外桑田映外洲硯沉洲起竟千秋當時揮手渾閒事衣被人間便不休

羊城寄酬張芸墅司馬疊韻

鐵力梁材蠟亮墻鳳池高閣借炎鄉尋常也有飛來燕錯認烏衣巷口王  
于溪家羊

城質鄭珠江  
太史宅住

絳帖鮮明出峻墻客窗夢破海雲鄉故人義比中郎重倒屣誰誇獨步王  
芸墅與子

世講戊午冬乃  
枉顧訂新交耳

周遭山色敬亭牆不厭人看信美鄉况是與人爭席罷江鷗無事是疑王  
摩詰語

鷗何事更相疑言野外之無機也芸墅官  
粵有思其才者今歸林泉當賦此處網矣



小築凌雲西坂牆夕佳樓霽筍茶鄉清溪不遠銅官路揮塵應招舊謝王建夕

佳樓于西坂集遠近册好游咏其間而省會諸名宿多與焉

小鳳聲清千仞牆玉垂雲撫竹梧鄉遙知增有金華業不數青箱學姓王即君巖有

能文

宛陵佳氣滿東牆望屬蒼生在海鄉莫祇八公山影裏閒心一片論淮王共聖頁蒼

生望今戀戀家山故爲粵人致此意云爾

### 題六榕寺泉亭蘭若

風拂幢幡霽景賒鉢閒鐘寂不聞譚道人也有傷心事繞砌都栽紅淚花

### 謁李衛公祠

海外詩宜上史曹衛公祠霽瘴蠻高致身本末千秋定那但燈紅醉小桃鸞鏡休傳挾瑟歌投荒誰記六箴多從教文化敷餘蔭梨面雕題奈若何

### 贈關中張子蓉湖次首用張文收事儼其善詩

寂寞崖州冷幕曹靈和柳絮拂雲高蘇家中表分明在渡海誰依泛梗桃

朱雀橋邊野草卷一

七

瘴海葭葦和雅歌佳詞一出萬錢多他年流寓瓊崖志除卻文收復有何

子羈旅嶺南知好落落惟石亭姊丈戚誼殷奎宣城張芸墅司馬友聲深摯感芸墅寄詩而及之

奇字從今不問曹麗辭紛映霽虹高朱欄倚遍千迴讀勝摘靈臺一樹桃  
天南落拓老行歌牡蠣牆飛孔雀多今日看君腰組改鬢絲誰與惜包何  
削竹爲筆筒似量銘之

器以律載以不律不居厥用乃大斯實

### 竹如意癢搔銘

不勞彼姑亦不缺我壺

### 九如癢搔銘

駢枝兮何有如吾意兮八九



朱雀橋邊野草卷二

金陵 朱鶴年 阜間 撰

曉行慶都道中呈王明府

昨夜靈灑灑驛路濕行腳朝日東海來迎人在林薄片散晴雲遙空作邱壑  
飛塵息且揚我車重聯絡開箴秋穫香操作習淡漠

雨中王浩疆總戎邀遊七星巖

昨入羚羊峽陰壑雲容漾夜泊羚羊岸環野蕩瀟瀟羣峰下新瀑遙隄趨輕漲  
好雨當時生洗淨春山瘴伊人飄緩帶風雲滋雅狀笑倚嶺間指揮開玉帳  
霖霖雪刺分賓僚長揖抗我本窮措大追陪將門將鳴鞭出郡郭星巖紛在望  
迷離五里霧濕透九天仗或其撐層空或獨巖危嶂踞坐或容與拱立或傾向  
巉巖削高空兀兀臨昭曠近握爛柯柄遠扼牂牁吭洞穴鬱幽奇洩發屬天匠  
五丁肩未休六鰲足無恙登陟領佳勝展齒極企仰撥霧藤蘿中攀衣雷電上  
苔花香可拾松葉翠足餉石罅滲鍾乳瑩光流沈釀經時天風吹虛籟獨和唱

朱雀橋邊野草卷一

又見洞雲還雨袖恣摩盪嵐影就浸漬山勢益骯髒愛此不能去長嘯寄跌宕

送斗一縣尉去閩省親次雪邨官席韻

之子去何之朝暉一帆麗余亦有高堂迺爾思無際桃李芬芳榕城正月  
桃李偏花春  
灘山雨霽客眸淚盈盈相對各沾袂

賦詩

賦詩道所得乃在山水間崖樹入空翠雲壑生潺湲遙巖足幽聽衆鳴息綿蠻  
性情獨有契半字未能刪天高星漢沈照人月一彎

市駿骨二首

千金市駿骨我欲疑荒唐以金與骨較愚惑固能量多金貴有用朽骨復何償  
遐哉市駿心斯智毋乃長

愛駿不愛真真愛骨亦愛駿當未骨時風力空羣革健芻日千里祇今餘骨在  
骨血自交瑩揮金寄三慨



紅臆誠慧鳥咬咬學人語花深朱欄曲奚奴相爾汝亭午喚茶聲恰可歌白紵  
阿誰拊翠背好音忽咽沮人生自有舌稱心未齟齬願毋傍輕唇鑿此能言侶  
棄婦歎

棄婦復棄婦羞向人前後冷落坐空房撫膺多刺謔當鏡理宿粧首面蒙蓬垢  
當窗掩清輝形影兩減瘦當席對珍饈齒舌紛躡躡當階拜初月北風裙帶透  
寂寂十二時迢迢五更漏憶昔嫁君平衣裳好摺縐枕衾絮且爛珮環温以肉  
三朝偕廟見前上舅姑壽喜氣宜室家歡顏悅長幼入厨煮魚羹鹹酸正相湊  
發機工織素一匹一日就阿叔髻垂肩以禮爲受授小姑長舉手指點金針繡  
琴瑟調房教曾協雅南奏幾時苟笑言而或辱中菁朱顏宜綺歲白頭許共守  
日月恨疾馳遂老林下秀鑒貌旣生憎徵德亦滋疚本是妾命薄豈有堪尤詬  
低頭作辭別開目成潺溜自勿封菲姿終待蘋繁石不謂三生慳竟蹈七出陋  
鏡鸞一時分靡無何日逝去去更何言義固人之面進退非殊塗士女詎異構  
妾志無二三君懷置圖究所願新人來視此車轍覆

朱雀橋邊野草卷二

二

贈顏維新明府

在昔復聖子不違傳孔學少年旣竭才道與天地若大哉三月仁衍此萬世禴  
厚氣孕根本明睿照實藹綿延生哲賢終古乃繹絡六十七代孫維新其益卓  
自秉祖德深更守家俗恪無忒知十姿遙發博文鑰曲阜騰雕龍臨淄薦負鶚  
爲郎嫻老會作宰精烹斫封州控嶺蠻邑小事盤錯爰推復禮意爲試歸仁畧  
農習郭外耕士識陋巷樂沐浴德教殷變革汚俗薄我也倦遠遊停舟聽軹鐸  
高揖上琴堂道貌温可託食我以嘉杭一簞如在握飲我以清釀一瓢如在捉  
息志領論言躁襟淨齷齪不揣揚高光所見同微燭竊聞禹稷人易地道弗炸  
苟有用行時三代將再作緬厥爲邦問素心非索寞定知繩武者努力任先覺

送顧餘庵入閩

憶昔見先生其猶龍之首培塿附岱宗的皪仰南斗師事近十年交情啟二酉  
指瑕弗掩瑜愛美乃忘醜把臂風雅林論心性天牖旣辨水醴滋亦應大小扣  
同病爲飢驅獨知有墨守竇積未去珠揆石猶在口一任百相侵自足三不朽



紛紛多涉人遲遲須叩友望望榕城陰盈盈灘水陡洋洋樂其羣呦呦求其偶  
快矣方邁征俛焉更進酒文章用有時志行要無垢願託魚鴻勞以永最修厚  
謁樓桑官用飛卿擊甌歌韻同吳鴻葦參軍

軒皇戰地人太古踪跡蒼涼無人語驛路經年吹颿風野林半夜灑東雨樓桑  
邨暮黍離離王孫故里認依稀雕梁參差支碧瓦丹堦零落長蘚衣當時炎祚  
擊一髮白帝城成鬢堆雪而今春社神周章萬歲千秋賽三月蹀躞金銜走香  
車歌安節緩舞騰拏喧闐百里擊邨鼓匍匐士女獻山花翠葆威儀復安在靈  
旗搖動錦幃斜君不見公卿畫壁光芒息風虎雲龍自顏色可憐恢復中原心  
未抵農家稼穡力

### 結交行

市井結交結財幣津塗結交結權勢曠膽抽腸在侵晨白日未匿已搏噬丈夫  
足跡遍天下要當同舟與同濟丈夫事業持風教何爲因循世俗例管晏最善  
與人交此道須引以自勵餘耳莽人安足數志士必有以自制我與閩華張公

### 朱雀橋邊野草卷二

三

子前人後人交三世所爭志行有損虧其慮舊學生蒙翳鴉衣練袞恣往還至  
今不忘貧賤契嗚呼閩華磊落人嶺吏二年命蹇滯相將握手五山顛一說交  
遊一揮涕

### 紫鳳行上張西溪先生

皖國高岡飛紫鳳梧老竹毓鬱楹棟雖離階啣五百秋九天長叶台鉉夢西溪  
先生弓正孫學追虞夏全噩渾心貌古於歲寒栢常時笑語同春溫綺年看花  
到闔苑小吟足人三四反天不與富與榮名世族中分南北阮冢宰推轂宰驪  
山政善教善無貪頑未向天家置心腹蚤養世澤甘寬閒虞帝陵前初日墜湘  
妃廟外柔風醉鷓鴣聲苦逐臣詩泮泮江深游子淚歸去鍾阜遶白雲幾載孤  
飛隔嶺竅笑著斑衣映雲影天葩當砌散奇芬即君作宦五嶺道雙車就養顏  
色好長君閩華作宰順粵人稱壽重南金羈客額手揚寒藻茲日先生養學年  
德先生來就養云正在花朝後十天瀛洲瑤草高於樹碧海滄波變爲田君不見春山幾萬層巒  
在亂插青霞迷朝晦羅浮神鳥破霄來遶遍公身當雜佩



新安贈錦川何耕遲

夢明府既赴鴻博試復為宰

寶安之山倚高天寶安之水匯羣川木葉不秋冬不凍縣城丸大春無邊錦川先生天下士一語出口萬口傳咀華漱潤藝苑裏仰山望斗五十年大璞就剖下和老來執牛刀甘烹鮮古貌古心恥輕進衫袖即當難苟遷瀛洲舊友賦離索昨歲招手金齧巔芝泥香檢雞初唱風蘭雨伏人莫前疇昔有愛在茲土慈父暫去民忘眠鐵船再渡琴更張禮教重與計安全君不見海山無瘴吐青霞海水無波長素蓮立言不貴立功德展驥奚擇鉅與莛

漁人行

循州合江江水春大船小船滿南洋老漁捕魚輒數百斜陽射網光鱗鱗猶憶昨夜與獨好推篷仰見天星小呼月與影共傾壺醉眠無夢醒已曉今日得魚魚更鮮香甚輕穿縮項鱸換來卮醪照顏色一聲欸乃衝寒煙

崖山悲

文陸二公世之讀史者已極表揚之矣予今有悲悲張元帥世傑也

崖山何岌岌崖海何滔滔繫有一塊肉尚有三人豪天意未可執宜為忠誠操

朱雀橋邊野草卷二

赴水甘魚腹倚窗空悲號死者崇統體囚者圖秋毫慷慨揮膾張太傅瘁風狂浪叱詫驕海門南去苟可通豈能一軍終速逃

王蘋園客池陽寄以長歌

秋老江深漲寒水岸走沙鳴柳樹摩獨客行吟尋芳莖高風掀潮擁江汜江汜上流流白雲徘徊九峰態不羣清影想見蘋園君攬我虛襟發舊聞洪鐘在架擬獅吼酒酣任人大小扣夜窗剪燭春翦韭寫心中竅得未有五月披裘冬葛衣不知五陵輕且肥脾晚登牀傲牙緋狂來自上秋浦磯秋浦當年李白遊至今無恙涵清秋如君潦倒多客愁搔首問天天知不見丈夫生當走天下名山大川與揮灑瑣碎鄉思無為者孤帷莫遣淚盈把

題侯履吉見獵圖

我友履吉夷門君霓虹其氣龍其文名山大川恣揮灑涉經弋史空儕羣一自問奇飽元旨羞為詭遇息舊聞書城久擁丈夫席筆陣閒掃美人紛邇日倦遊炎荒路高秋澹入鵬鶚雲誰家布圍掩狡獸相與逐隊求騰麋捉生力技如虎



臂雙連技瘡長楊齟組轡壯徵飛食肉錦鞞柔曳煖藏芬習獵有時亦有道開網能殺乃能軍擇肥命處貌敗膂割輪焮侑驅醜君不見圖中佞騎紅粧色刻飾垂髻含愁懃圃草欲芳柳欲綠猗靡教覓封侯勳

題劉紫藩觀察修竹歸鴻圖

老可胸中成竹多無那城上鴉啼何引紙伸墨替吟哦向晚揮灑煙霧過山之阿水之沱秩秩苞篳安樂窩提提歸飛忘網羅載集載止聲音和以遊以休寬且適自今夜夜半訛尙無單棲感驚訶

建陽晚泊

葱鬱嘉禾地垂蘿好繫槎夕陽紅到嶺拳鷺白於沙市雨清涼葛溪風澤瀉花將來酌邨醪遲月聽秋笳

下灘

高瀑迸谿飗危灘走石沙滿船落花雨無處聽蘆蝦險借開山力神如貫斗楂稍公真可託生死在騰拏

朱雀橋邊野草卷一

建溪舟中

棹繞建溪花乘風日半斜放灘驚不到鼓楫興無涯市語喧紅樹波光上白沙最憐九皇鶴兩翼武夷霞

湘江

江上流瀾溪爲典泉孔道輿人率買舟息肩舟人以篙著船尾孔中在岸上推而行之計刻而至

湘江三十里野港百千支派絡羣山瀑紋潨古荔枝船供肩任之篙學載推遲獨我躊躇甚臨流泣路歧

上杭下灘

閩嶠上杭隈高灘一線開自從諸澗合直下半年天來盤折凌山骨爭鳴響夏雷浪遊人到此有夢欲驚回

入粵道上作簡大埔熊遠齋明府

七閩留遠自百粵振征衣漸就紅輪馭先摩碧海圍雪天火米熟冰澗雨龍蹄被服和風在蠻煙未許飛

聞閩華罷官清况詩以寄之

閩華坐貪去官不三日卽絕糧貪者如是固宜廉吏之多也



聞道貪明府官休糧亦休擇蔬防莠口飲水漱詩喉膳有高堂問家徒四壁留  
美名原不易患難要含羞

元旦有感二首

卅年爲客久三度嶺南春蠶雨迷羊石蛇風觸鳳津荒城悲旅夢昨夜酌詩神  
自笑羈縻骨眞爲浪跡身  
我亦有家人誰堪此日春山風吹露井日暖雲津貧極呼如願飢來問谷神  
總無方縮地只是夢分身

野吏亭觀漲二首次茶陵劉二江韻

野吏亭窗迥將軍旌旆青時進師古州雲根艤遠舶香草認迷汀遠寺鐘聲濕吹門

魚沫腥淙淙新漲處可便接南溟

江合城樓下梁浮宿霧中惠州東門外有浮梁在合江樓下

千里人懷一畝宮何當招紫翠滿袖夕陽紅

石濂在從化山中

朱雀橋邊野草卷二

何年經鬼斧鑿得石濂開百丈雲根下諸天花雨來曉飛林氣遠夜散月華迴

憑語枕流者靈臺好滌埃

燕子磯

石燕舞何年凌風羽尙翩一拳吞海日萬里豁江天今古晚潮水陰晴冷社烟

自從無鐵鎖更不怕樓船

留別車繩遠諸內兄登張稼蘭若谷明府舟話舊遂泊龍江關待發

萍聚感星分孤舟倚夕曛秋迴廿載夢江瀉六朝雲聞裏同衰鬢欣翻鳳賞文

還愁鼓柁曲風急不堪聞

分船次韻

同作天涯客風情判兩船清暉秋水外疎雨楚山前衰晚相依影江湖不定烟

推篷招手笑何處月偏圓

送春二首

忽判風光袂天涯更愴神人生多此別夜半怕開樽綠送原頭草紅餘陌路塵



關心思遠道何處渡芳津

送春何戀戀老至愛春華有夢驚槐火將心託蕙芽擔風雙袖冷衝雨一帆斜  
南浦年年別江郎筆有花

紫山墟

灘轉荒墟合環山紫氣偏烏樓丹穴樹雲占夕陽天市酒迷朱檻樵薪帶杜鵑  
紅塵人易老峰影自年年

泰山道中與戴寰中瀛話封禪事

泰岱凌虛極杳冥羣峰羅峙遠天青大夫松引雲爲佩仙子閭分瀑作屏磴道  
盤空猶鳥跡輪蹄踏翠挹山靈停杯閒問金函事道是三宮有帝星

七里灘二首疊許丁卯韻

千江孤棹閱浮沈七里高灘接暝陰旅夢生殘驚野月鄉思搗碎度邨砧瀑飛  
宿雨雲根冷樹轉危崖鳥道深險磧怪磯都不問虛舟一寄漫遊心

海渚潮迴山欲沈客星祠霽水還陰有無風判扁舟事世傳此地有風七今古里無風七十里云

朱雀橋邊野草卷二

七

愁生八月砧冷翠逼江松影靜蔚藍印石浪痕深可知打槳閒吟處寂寞魚龍  
幾夜心

蘭谿

灘勢盤旋槩力情蘭谿葱鬱接萍蹤山城作市雲先入邨確無人水自春紅寺  
小藏雲頂瘦青林深染佛頭濃誰知昨夜經春雨一望浮塵減幾重

楓嶺次韻

楓嶺浙閩西江之會幽境也亦要區也舊有營守之愚以當設鎮建關招民居焉嘗獨山阻抑亦海防矣故及之

楓嶺龍葱磴百盤吟肩高聳客眸寬諸山飛鳥衝人下萬壑噴雲作海看父老  
鬢眉秋木古將軍甲冑曉風寒何當百雉營新鎮一爲南天建鬱單

劔津阻雨

凄惶嶺上雲頭湧黯澹灘前雨腳橫炎夏移寒鶯素葛荒郵傳警載青旌浮梁  
雙鎖千山瀑沈劍陰涵百雉城已是繫舟行不得况聽叢竹鷓鴣聲

送丹木翁處士

鷓鴣聲裏喚人回直欲中分餞別杯決去輪君難信宿好遊愧我重低徊漁梁



嶺樹雲環合，箭孔灘舟瀑。灑來知有幽懷經，百結定從鄉夢破。時開

上黯淡灘却寄雪郵官庶暨玉雪諸子

重來黯淡水漫漫，一葉扁舟轉亂灘。怪石千堆磨劍鏢，奔瀄百折滾珠盤。關蠶叢險穿高隙，撥屨雲開曳絳端。寄語年時同濟者，下灘未抵上灘難。

去閩之粵舟次沙陽却寄戴近軒明府

吟身結遍建溪緣，衣印泉花袖籠烟。久住漫愁絲織髻，遠遊更上紙糊船。建溪有紙船，鐵船。公之謔。秤鈞孔，鬪羣流險長老灘。參一線，禪秤鈞長老皆大灘而長老尤險。無兩岸石壁一水迅流幾十里。

限好山看不厭，久要重約後來年。

昌黎祠

在崎嶇通衢間，與人有泰嶺東盡關西之號，蓋假借也。

雲氣猶封巒嶺外，雪風偏拂瘴江濤。自從抗疏批鱗逆，長借行吟勒石深。祠覆霜林紛五色，階喧寒雀轉千音。握衣酌酒幽崖下，知有文光接古今。

贈清遠張閩華明府

鍾山秀與皖山迎，蓋世人爲瑞世鳴。司馬三升周選舉，茂才交薦漢功名。月過

朱雀橋邊野草卷二

滄海珠光滿，風入蠻芳草露清。笑我羈遲韓李未，南天來聽著鞭聲。

題家中峰先生象岡石小山

滿室爐香盡不消，巖巖石丈倚虛寮。破身礪齒無人問，化虎成羊鬪歲遙。潤極欲爲天半雨，臥來聽足海門潮。相看饒有凌空致，一縷雲腰繞碧霄。

舟入西樵作

萍浮梗泛問西樵，霽色盈盈一望遙。鼓楫聲隨深樹入，乘風人有隔江招。峰巔瀑灑炎天雪，溪畔雲拖海室綃。猶是粵山堪買處，數椽無自結山椒。

龍江夜渡寄大埔坪周織甸天司馬

龍江夜色入平沙，潮半來時月半斜。屨氣陸離開海市，蚌胎的皪掩河車。樓船壓浪帆三丈，畫角臨風鼓四撾。最是通宵看不厭，推篷長嘯靜東霞。

將遊羅浮作

聞道羅浮四百峰，一峰一萬朵芙蓉。鍊橋路是秋偏好，丹竈泥於今未封。蝴蝶不離山木宿，籠篋祇有洞天容。幽尋畢竟先成約，我約青雲伴遠踪。世云遊茲山者有約



弔朝雲墓

相隨學士謫南天鬢影眉痕悟幻緣儋耳春深羈謫戍巫山夢醒習空禪時宜  
不合同聲泣瘡痍頻侵弱骨捐千古六如亭畔草青青深覆玉肌僊

惠州七夕

此番巧乞阿誰邊悵望高樓客未眠千里夢分蠻嶺月半天秋入海城煙東方  
好怪鸞踪杳南阮禁貧犢鼻尊說似女星應罷織有人頭白已經年

贈別菊裳

論交重疊舊居羣記得鬢年時指君自是家聲羞鹿角只從鄉校識龍文浮山  
影入三更月碧海秋驚萬里雲此際相逢正回首那堪歧路更星分

羅陽溪却寄黃蓮蒼明府

屢過羅陽枉問津照人清澈水粼粼丹砂未冷千年火朱鳥遙呼隔歲春深夜  
海帆迎目馭新晴嶺樹戴雲巾可能便免山靈笑直是浮山影裏身

朱雀橋邊野草卷二

冬夜宿香嚴庵贈僧大來

舊連州可訓也

梵鐘敲冷海天秋漚性冰才一夜收剩有寸絲階下挂直饒阿耨數中留寒添  
佛火人無夢詩發空山月滿樓沒得工夫禪榻坐年來行腳未能休

冬日書懷次羅一韻

跡寄天南刺寸絲羅浮雪壓鬢邊時激江活鮒謀偏拙挾策亡羊路更歧海日  
每驚中夜見巒烟未怕十分欺笑看寒鳥飛鳴倦不上長林上附枝

送沈用濟舟病歸龍江兼寄語山靈長履先古邨諸子

客山降盡是詩魔忽與君離更杜多社多西方言此土言抖擻也小院茵泥深履齒九秋風  
雨冷絃歌倚門人正聽歸櫂謹疾身應鑿逝波料得五山吟社裏看山杖子又

同拖

一奏

一奏環天八駿飛碧蒲黃竹事非非綺窗深鎖璠膏暗翠帳輕分玉履違甜雪  
有花光自冷素蓮失蒂子應稀春霄宮在人無死追憶鸞輿跡已微



從化山中簡李聯卿明府

更無世事與將迎，作臥都關真隱情。欹枕靜聽幽瀑落，拋書閒看遠山晴。長松撥霧紛嘉蔭，異鳥搏風入紫清。四百二峰應已近，便當深往勵黃精。

羊城喜晤劉瞻山二首

黃金臺畔舊居遊，自分攜歲十週黷。澹灘深去住羅浮，山好慣勾留。每當風雨淒淒夜，便憶聲名奕奕儔。不道重逢炎海上，高雲清影認司州。  
山由閩入粵，倏忽十年。相見幾不相識，故云云。  
京師別瞻

由來君亦是勞人，不復冰條曩日身。俠膽麻游增俊偉，新詩自寫見精神。北驅

芸冷縈春夢，九陌車迴剝宿塵。獨羨垂髫問字者，幾年庭訓便成麟。  
即君曾從子遊，今有聲譽。

序矣

入增江先柬石泉姊丈

增江曲曲碧磷磷，疊浪搖空迥絕塵。紫翠逢迎帆路影，蔚藍離合洞天春。望來佳氣連雙塔，知有神君繼古人。市味可曾新掛絳，等閒饒煞看山身。  
增城荔子掛絳最佳。

朱雀橋邊野草卷二

自粵歸舟中與周洪音茂才閒話

鴻飛天遠影冥冥，冥歸路棲遲老客星。漁網截江村渡寂，神旗遮樹野祠靈。蘭芬幽峽心猶素，梅標深林實又青。踪跡不同聊共濟，盧中安穩託飄萍。  
時有中傷子歸里乃覆之以行也。

同俞穎園學使守風次韻

又賣扁舟賦遠遊，西風江畔任勾留。浪花高拂空城夜，雲氣濃遮六代秋。把酒頻澆懷磊磊，敲詩共遣興悠悠。近來踪跡真無賴，渾似隨波上下鷗。

清江舟中和廉舫方觀文先生韻

秋入清江江漸深，長天遠水共蕭森。聯拳鷺鷥鷗棲暖，縮項魚潛鱉舍陰。零露漬酣村外樹，斜陽搗碎岸邊砧。隔舟儘送除愁酒，不那愁多動醉吟。

遊白雲山

粵人每於七月作旅遊之會，云是尋安期仙跡也。

逃世仙成幾劫塵，遊踪何處拾遺薪。同來都是中華客，將隱誰為絕頂人。刷木半檐山雨細，流杯淺酌澗霜新。冥冥唳鶴清無影，問盡雲深十道津。



檢得陳秦鷗手跡六截哭之

每賦招魂什寒霜下四更千秋人世恨文學天陳生

十載西窗客五年故宅人不堪有遺跡留與海為塵

奏昭生時與玉雪同在予西軒讀書者前後幾十年也

定是脩文去還應蛻骨來穉寒啼小鳳清徹動餘哀

人冷二難影樓空百尺高尋常理遺籍痛哭廢離騷

阿弟文戴能文而憐

古道照衡山生勢直等閒揮涕拾殘稿宿草共斑斑

王雪收其詩文將刊而傳之又嘗經理葬事

乾死讀書螢寒生半夜燐西風吹淚睫猶自見吟神

既寄玉雪以詞因念雪邨宮庶舊誼又賦兩絕句達之

羅浮山下影猶是三山月不堪離索久剩照朱門謁

為語舊居停逢人眼漫青麥舟酬未得海角抱殘經

莫愁湖

有女多愁甚偏將喚莫愁至今波影裏涼月在高樓

朱雀橋邊野草卷二

翠螺山

遠山小如螺浮江翠如滌我欲凌天風山頭橫玉笛

牛渚

陰陰牛渚磯神怪潛萬狀如何然犀後夢冷菰蒲蕩

姑孰

亦有詠史者蒼涼不可聽西風過姑孰寒霧暮空亭

蛾眉山

秋山如粧好秋水如鏡移誰調九子黛染就雙蛾眉

板子磯

健哉黃闔子臨江泣天步怒浪拍長風輕舟不敢渡

江上看初月

空江看素雲輕浪溶溶展誰垂水晶簾玉鈎不勝卷

咏焦孝然次金古良韻



隱士知所處百年勿復語一語將百中不以資黠鼠

疎雨洲

夢斷淡煙草閣小莊樓名愁經疎雨芳洲迷離夾岸山色噴薄半夜潮流平浦水禽雙宿好風帆布全收暗計去家千里有人此際憑樓

趙北道中和戴雪村太史

野淀溶溶漾碧空炎威不惹藕花風從今始識燕南路十道浮梁高柳中

入巖塘寄天台友人

襟清袖冷入巖塘芳茵幽蘭十里長為憶天台山下路君衣應較我衣香

羅源夜坐簡王紫蘅明府

海雲深處寄年華秋到羅川夢到家譙鼓三更人醒後一庭夜月紫薇花

次韻酬答媿莪先生晉山車六四截

千載高松剩弱條近來不復擬凌霄無端移樹南天外怕聽詩人說六朝

海濱何處問蓬邱大衍傳時水逆流武子少年安節老定知衣鉢有人收媿莪高弟

朱雀橋邊野草卷二

晉山一人而已

閒翻新語證茲山百粵山靈半識名最憶羈人維權處羅浮好鳥未相輕予初之粵

過浮山下適朱鳥集旅舍之樹境羈人偶值此不能以為有意來迎也

兩鬢斑無一事成壯心熱向冷灰生桑田南畔安瀾久可許乘風挹紫清

送施宁陽大令

海上浮山幕蝶衰喜君攜筆寫山雲可堪勾漏爐中火鍊得離愁有十分宁陽來粵

未幾又歸友朋難聚而易散如此

送余瀛友歸娶瀛友善畫

沙聚萍分事等閒未應臨別淚潛潛好將客夢生花筆去向晴窗畫遠山

題莊子

莊生元論世三篇為引遊人入漆園只莫夢中尋蝶看多於繼鳥大於鯤

題戴雪邨宮庶詩卷

神龍踪跡秋蛟氣儀鳳聲音海鶴姿尋向直東縹緲外許誰認得雪邨詩



題紫司先生文集

心有三篇高士傳舌無半句俗人詞  
朱明洞裏泉源地雲澹風微見紫司  
順德留別闖華

重過冰衙證舊聞清於秋水澹於雲  
如何一線龍山月照著征囊便十分

羚羊峽示松峰

羚羊峽口櫓聲聞驚破嘉魚網裏雲  
兩岸山光瀉空翠不知許共阿誰分

半塘作

荷葉香深息世機半塘雲水自依依  
天池閒煞容垂釣不管蘆花飛不飛

郵上別汪衡朝茂才

世皆欲殺偏憐我意獨相憐  
最感君九里嶺邊分曉袂松風薰透一溪雲

小雨

濕雲漠漠霧濛濛臥讀新詩半掩篷  
已自驚人還笑鬼不知誰肯借東風

舟中月夜

朱雀橋邊野草卷二

三

天空夜靜水花香愁載扁舟秋夢長  
驀地推窗清影入不知是月是江光

長相思

越羅衫蜀羅衫怨黛愁紅子細看無語  
五更闌欲去難竟去難目斷腸迴馬

首寒有淚不曾彈

送闖華入都調寄鳳皇閣

幾年來搖嬾蜚家柔櫓頻煩送客看  
花去一樣珠江曉月錦石夜雨偏不滯陸

生行旅好風不斷漫教催船打鼓便應吹  
到舊時路祇我聽慣揶揄笑者如

許禁不得雲晴天暮

別玉雪三年矣十一年秋見令叔承翁于五羊席上並得所書扇子調寄

鳳凰臺上憶吹簫高山流水二闕寄之

驀然回憶少時年有三人共拍吟肩香燭透高窗  
鍾山影裏鉤玄真如夢漏下

鐘邊驚魂欲斷昏眼淚漣漣百尺樓空剩君家  
與我老大學游仙頻遷三山

客子跡禁不住雲引風牽珠江上數拳羊石半畝花田  
逗清狂詩酒任留連海



潮前淘盡尉陀霸氣勾漏丹緣倍愁予無霜無雪白頭天  
思君正在月明宵照纏頭促拍長箋乍可綺筵開爭看大阮丰標歡陪際筵雨  
炎濠烟環雲布小扇寫青瑤認是君書祇漏痕釵股應瘦沈郎腰 頻睂斷腸  
將盡處三秋了不見冰條黑甜裏蛻游春澤鷹脫秋嶠幻因耶而讖應寥寥問  
浮胥手畫石樓天闕瀛海雲濤鯉魚風憑吹長獻寄清寮

瓦硯銘

將爲其合抑爲其飄奚如席其珍而以爲清瑤

百碎端硯銘

或曰水蕨或曰水肪百補之餘四友之長

集毛詩爲端硯銘

維石巖巖膚如凝脂追琢其章與字宜之我疆我理我泉我池溫恭朝夕樂子  
之無知

依稚川入山符成一硯銘之

朱雀橋邊野草卷二

西

鬱炎劫乃爾開入青城繫我偕

泥沙硯銘

揚波者汨簡金者市彼且爲有沙泥將與爲無町畦



從伯祖臯聞公諱鶴年改諱露鶴字隄人師晦公次子侗儻有才識狀貌  
頎異康熙辛亥戴雪村督學閩中邀公閱文旣而入粵以商籍入學補廩  
膳生候選訓導時新會令車公敏來爲公配車孺人之兄敏來父名鼎遂  
晉官翰林  
久居與乾隆庚辰卒年五十六以喪歸葬姚坊門子二長諱漢字倬雲早  
卒次諱渾字文若公詩古文皆博與繁富之多散佚道光己亥從姪孫緒  
曾謹跋

朱雀橋邊野草跋



懸磬集

金陵朱延年萬斯撰

覆舟山行

行行日暮前村暗夕暉鐘聲出林際棲鳥滿四圍倚杖聊佇立睹物心忘機  
白雲招我至山月送我歸

衡陽寺

絕無僧住宿丈室借雲扃鼠噉神鬚斷蛇盤佛髻腥昏苔作繪紙掛樹通靈  
欲覓殘碑讀山樵不解聽

從伯祖萬斯公諱延年鳳綸公之次子出嗣尚符公貧而教讀乾隆中爲  
友人所累幾被逮事曰愈窘嘗謂子弟曰文章詩歌其禍最烈汝輩宜慎  
之而交遊更不可不擇公有懸磬集吟咏頗夥散失罕見晚遊獻縣歸老  
於家乾隆壬辰卒年六十二葬紅馬羣子諱漪殤次諱溶字漸東出嗣兄  
希賢公諱彭年之後道光庚子正月姪孫緒曾謹跋

懸磬集



雨後

天意憫我農甘雨四野沃土溼受犁輕枯棹澁春綠泥塗有至榮霑體豈云辱  
臺笠覆東臯歌唱中曲曲村居無所期得雨願已足慰彼力田人粒薦秋盤玉

短歌行

白日何短短百年愁中滿羲和縱轡長誰能挽扶桑蓬萊幾清淺海水塵飛揚  
彭咸饑不食桃枯綏山陽金石詎云壽石泐金銷光役役求神仙瑤池過客場  
混沌儻不鑿萬古同茫茫

贈范元銘

君才快如船下水破浪乘風片颿駛詩成不敢潭邊吟恐擎潭底雙龍子癡龍  
警醒修騰雲鯤鯨奮翼海波徒靈境恍惚蓬萊宮欲喚琴高騎赤鯉君身仙骨  
世上無小謫塵寰聊復爾我亦能詩境更窮山妻椎髻見稚齒山中舊有玉川

洲居集

居破屋數間而已矣今年圩漫基址無轉羨茅屋秋風起吁嗟乎我輩自窮非  
詩工惟有詩成能暫喜石湖居士真仙人聊賦長歌報桃李何時吟嘯共拍洪  
崖肩下視齊州九點烟霄裏

垂釣

春水生淪漪乳鴨沙塘叫我志不在魚無事學垂釣結網毋乃貪偶取亦良妙  
有時觸餌驚欲縱仍自笑何爲拱而立恭敬宛然肖世無蒙莊叟惠施空見詭

棲霞晚眺

登高直上紗帽峰腰健自喜非龍鍾長江巨浪湧亭際足下一朶紅芙蓉海門  
見漾光出入依稀似聞焦山鐘飛鳥亂投翳林木長嘯下山烟萬重

明故宮

禾黍歌殘夕照斜皇居縹緲認東華青絲白馬兒童識紫蓋黃旗帝子家野老  
自耕官寢地樵人時刈御園花鍾山依舊盤龍氣陵廟秋風噪暮鴉

草庵夏日



郊居五月早鳴蜩門外籬根驗午潮避暑瓜何須鄭灼愛眠人似學邊韶境  
辭  
城市心俱靜福到詩書氣不驕村塾無煩紫利祿閒將稼穡勸垂髫

菊

中央色宜黃圖經亦尙白菊品自清高不假陶彭澤

借夏景常奕

老來詩酒心都懶惟有楸枰興尙存有約自來常夜半鐙花敲盡寂無言

西湖

楊柳春風擁畫圖記曾好句詠西湖誰人領取真明淨一片秋光畫得無  
蘇白情懷逐水流隄邊我亦惹閒愁越人但唱浣紗曲不唱吳宮梧葉秋

遣興

茆屋低垂草覆肩鳴鳩喚雨落簷前杏花開盡蒲花發閒閱齊民要術篇

衛霍

將軍猿臂竟沉寃突騎雲中復五原漢代將才推衛霍勲名只在尙衣軒

洲居集

石頭

鬚眉真愧丈夫名曾說黃蘗付與卿千載石城腸斷曲至今猶恨褚淵生

叔祖敬聞公諱遐年一字居敬襲聲公之子也從外祖王燕嘉學甚奇愛  
之容貌豐碩和易無怒色嫺親宮兆麟爲安陸太守延公至署公不耐繁  
華遽歸遊浙東直隸皆暫往嘗曰貧者士之常他非所願也襲聲公葬親  
東陽念姪輩皆居金陵省城艱於拜掃公體親志遂家東陽爲村塾師乾  
隆癸丑卒於太子洲年七十四子諱潮字平江孫紱曾純曾耀曾今惟純  
曾存病瞽道光庚子正月姪孫緒曾謹跋



題唐開成石經爾雅

我聞泗水訓觀古在爾雅溯源自元公增修賴子真為政先正名訓詁不能假  
 孫炎暨李巡古本悵云寡景純築高臺菁英擷腕下密如絲出爾精如金在冶  
 學海驚望洋足示問津者陋俗本訛魯魚成三寫四氣訛四時東選宋王融  
 云四氣和四時之氣今本直作四時和謂之玉燭孫炎注沿襲多癥瘕楊鳥  
 焦獲類釋地周有焦獲訛作獲鳥白屬訛作楊鳥形聲殊苟且唐本差近古頗足供取捨蓋年嗜  
 此經珍逾寶帶銙手鈔不辭疲名物資搏摶輶鶴辨天籟六駁更數馬康瓠亦  
 不棄何況瓠甌瓦愧非磊落人昌黎來嗚嗚徒歌謂之謠東牆燭殘炮

拜母像

母生而不能養兮歿瞻母像嗟晨餐夕膳兮曾不能通乎肝鬢目尚恍而如有  
 見兮心徬徨而注想嗚呼痛哉願相從於泉壤

雲圃集

先祖考大有公諱逢年一字雲圃景略公側室楊孺人之所出也金孺人  
 先卒景略公捐館楊孺人誓守墓板橋十餘年公迎歸備極孝養既歿懸  
 像朝夕瞻拜如生公工書法嗜爾雅嘗手寫之公卒道光辛巳年八十葬  
 鍾山紅馬羣子諱濤字錦江太學生孫緒曾道光庚子春二月孫緒曾啟  
 跋



待潮集

金陵朱瀾安齋撰

耕籍

耕籍隆今古田歌雜鼓鐘九推終半畝一拜祝三農表率臣才愧承宣 帝澤濃桃花迎戰仗春色遍提封

壬寅五月 行宮召對恭紀

王事勤劬久 君恩召對長面承 天語謨衣惹 御鑪香書靜槐陰密

風清 殿角涼小臣膺 寵渥何德效龔黃

二月初旬盤山卽事

曉發沾清露春遊淑景芳馬行新翠軟人踏落花香來往商民樂耕犁畎畝忙 韶光榮萬物歌詠滿康莊

盤山多梵宇秀氣拱 神京古樹參差映禪鐘遠近鳴雲從峰半起花向石中

生到此塵鷲靜襟懷別有情

待潮集

山中多怪石虎踞臥龍橫花密紅香遠巖高翠色迎樹鳴風送暖谷應鳥歌晴

處處逢僧話何緣快此生

千像槐三代 千像寺古槐旁生二樹其一發自老根其一生於次枝名三代槐 雙峰兩澗通 雙峰寺前即東西兩澗 山高

餘臘雪鈴響動春風古塔晴雲罩中盤寶殿雄回環經百折一路匝花紅

春透晴巒秀香深石徑環 上中下五盤繞石皆花 交加千樹幹盤繞數峰山絕壁崇堪步

高枝近可攀豐年真有象從此悅 天顏

獻縣道中遇雨

舊治重臨已十年每慚製錦學難全桑麻到眼濃如故父老隨車樂滿前僧磬遠敲林裏寺農歌歡慶雨中田行看馬首東來日澤遍郊原草木鮮

雜憶

老將至矣靜中思何日纔能百事宜晴嶺定無寒霧障好花偏喜暖香遲先覺 每愧居官術積厚常追治獄奇晚到休嫌知己 梁制軍題余小照 而今花甲

正當時



樂育圖

天地以好生為心發育萬物長養滋培靡不盡其極致雖草木之微亦必施之雨露開花結實各遂其生人為萬物之靈既受天地生成之德應體天地好生之心隨遇栽培灌溉是亦不忘賦性之本云爾

春暖園林風日和中天樹影弄婆娑  
芳菲原毓山川得葱蒨非滋雨露何壯歲  
學疏知事少老年心靜覺情多  
生機遍野春光普坐看秋來實滿柯

季秋登盤山東甘澗

山徑盤旋山勢崑晚晴斜照萬峰迴  
四圍翠壁開屏錦幾朶紅雲籠石苔鐘磬  
聲聲出霄漢丹青步步上樓臺  
眼前邱壑胸中景可有徐熙畫得來

九日偕河間吳橋東光諸令登撫寧縣天臺山乘月

峰巒層疊勢崔嵬聯轡天臺步夕暉  
人帶紫霞山返照樹翻錦浪月流輝  
瀛洲勝友開瓊宴同遊三尹皆瀛郡屬  
梵院禪僧啟玉扉差幸政成輿頌洽  
相將長吏醉言歸

秋日恭查蹕路遇雨更喜晚晴有作

待潮集

馳驅 王事廿餘年最愛清秋細  
兩天四面碧雲山絢彩兩行翠障柳含烟  
農疇得澤欣多稼 御路無塵省鑿泉  
路旁多開井清塵更喜晚晴西照爽  
明霞常傍

六龍邊

小陽月查閱海河疊道

疊道逶迤幾許長海波輕漾錦鱗揚  
欲描翠黛舒隄柳已老朱顏借夕陽  
宦轍久馳忘歲月河干徐步見行藏  
小春已喜羣情暢指日春回萬卉香

旅館初度

荒村小飲度生辰跋涉舟車望六旬  
閭里何時輝祖德妻孥今夕話天倫  
身慙老至貧仍舊子為饑驅宦各新  
族誼先塋多未辦每驚馬齒歲加頻

初秋早平山行

峰碧溪深秋氣清衿衣貼體曉風輕  
山花遠近迎人笑野鳥高低應候鳴  
可喜大田占足歲卻憐比戶半貧氓  
馬蹏到處增惆悵憂樂常存感至情

思遠圖



余幼孤家貧繼以回祿復罹母喪饑驅四方十有餘年吾妻攜子女相依母家糲糠茹素井臼親操念子起自微員仰沐 天恩忝膺郡守雖非顯宦然夫婦咸荷寵榮長子亦通仕籍較之曩時不啻霄壤此皆我祖宗積德餘慶佑我後人於以徵天道善無不報今年近六旬精力未衰尚思黽勉未敢稍息若復數年則老將至矣爰繪圖以記之並成一律

曾記當年俱少時爲貧每歎苦分離  
桐亭日暖陰偏遠桂樹根深馥更宜  
自愧黃堂修職業幸膺 紫詔擁旌旗  
老來相伴仍思逸白首同歸上壽期

登長城嶺龍泉關

攬轡崔嵬聽馬嘶霜曉步步踏雲霓  
三關鎮地千巖拱有東西三關嶺朝天萬壑  
低臣職馳驅承輦轂 聖心巡省愛黔黎  
深慙來作常山寺兩巖 宸遊日下躋

再登長城嶺

待潮集

三

東來佳氣歲常逢喜值 宸遊扈蹕重辛丑丙午兩次辦差積雪漸消山脊凍  
早花將綻樹頭穠平疇疊翠環千壑高嶺層嵐壓五峰長城嶺高並五臺而關形增勝眼底晴光榮庶類無邊春色樂陶鎔

自題春山拾翠圖

余生長南濱宦遊北岳三十餘年睽離鄉土瞻景回思隨風神往聊賦  
二律用誌斯懷乾隆丁未仲春自題於直隸會垣清河官署

山徑崔巍水徑斜桃源深處有人家  
苔橫遠岫鋪新翠花綻前溪浸曉霞  
登眺不辭勞杖履低徊未免感天涯  
江山秀色情無限領取韶光興自賒  
憶別江鄉已卅年青溪空繫釣魚船  
花間樓閣圍紅雨雲外峰巒疊翠烟  
恒岳天高迷度齒盤山風暖趁絲鞭  
舊遊拋卻長干路何日棲霞老一廬

登龍窩寺

一聲清磬破層巒四面山峰勢曲蟠  
地接井陘驂走怯天垂泚水雁飛寒  
蒼崖陡起松杉合翠磴高懸殿宇攢  
漫說淮陰征戰地卽今偃武萬年安



感懷寄紹曾續曾二子

我父子均沐

皇恩皆我祖宗積德所致每思上未仰報

君恩

下未澤及閭閻祖宗門戶祠宇祭田贍族遠計俱未籌及年逾花甲不知能全此志否寤寐思之時深感痛作此記之或有不全惟後人繼志行之是孝子賢孫也時乾隆丁未歲仲秋寄閩常存勿怠可耳

躬沐

皇恩逾卅年德從祖積福邀天忠誠何日酬高厚利益惟期濟倒懸祠未創修家未立族無贍產祭無田念隨寤寐多傷感老境何時得靜緣

嘉平二日旅次

桂苒光陰七九春

余年六十三

慣從旅館度生辰素餐愧沐

恩高厚保赤惟期

惠普勻家乏寸楹輝故里野無恒產贍周親未來歲月嗟將老猶趁餘生志欲

季夏恤災順境喜雨用囑諸令

幾日田疇載雨行村村男女有歡聲昨聞匝歲無涓澤

自上年六月至今季夏俱無雨今見連

待潮集

四

吁悉耦耕雖是好生天意厚卻緣撫恤吏心誠訟停役息傳呼緩且讓農工秋大成

深秋道中

策馬天高爽氣多劇憐老至奈秋何長途日久空能識短鬢年來已盡皤村舍

穀堆金縷脊山厓柳補翠雲窩

柳色尚多深綠

驅轍跡風塵厭安得歸田自歎歌

紀懷

此心不自為豐盈每事都從愼後成一紀閒車供佐職六年要郡守專城公餘未縱身安樂念動常憂世苦情天道好還千古事平生莫慣與人爭

自題江天攬勝圖

陽和淑景曉天清滿眼欣蒙盡有情江闊靜涵千派潤山高暖罩萬峰晴雲侵

衣袂花邀坐風引帆檣鳥送行六十四春嗟桂苒此心何以慰生平

天開錦繡靜無塵水碧山明氣象新檻外晴雲雲外嶺花間小閣閣間人江村

向暖垂青柳漁網輕張獲紫鱗收攬風光多少勝眼看世界盡皆春



紫荆關山樓望雪

彤雲靄靄起晴空頃刻花飛六出叢今日紫荆成白玉隨時變化是天工

訓子帖

自古盛衰反覆乃天道不易之理苟能轉衰復盛必有積德回生始得冬盡春生冷灰復煇殆非偶然也吾家自太史公捐館後中落蕭條已爲極致數十年來余始由微員歷官郡守兩子亦登仕籍皆是我高祖祖父歷世讀書學古守分安命忠孝仁義家訓相傳故天道好還始漸有來復之機足徵今日之能仰沐 皇恩皆出自祖宗積德回天甫能轉衰復盛本本水源信不誣矣我輩爲子孫者既知身受祖宗積德之報豈可不思仰報祖宗耶今欲追思圖報惟盡心用力於墳墓祠堂及一本所生之族眾耳高祖墳在牛首山旁吉山東善橋周安衝杆子山我曾祖墓在棲霞之側東陽夏家邊我祖太史公墓在安德門外西善橋吳家山口我先大夫墓在太平門外紅馬羣此四世墳塋分坐四鄉必當於各墓側建立祠堂供奉春秋祭祀便子停息及看墳居址就近照管

待潮集

五

除紅馬羣先大夫墓側業已建祠立石其東西善橋及東陽三處俱尙未建祠皆應急辦未可緩者又金陵城中二郎廟繡衣巷內乃吾家舊居昔者貧窮拆售存基地歸於方宅緣此房先爲方氏祖居後歸吾家今將西偏仍還故主立祠其東連之地是余買自老姓等數家拆屋存基將來建宗祠於其上以爲合族世代春秋祭祀之總會庶不離舊址乃我祖宗曩時居處燕安之熟境也至若各墓建祠之後所有春秋祭費歲修墓祠培植樹木及看墳人養贍必籌久遠之資及中廢之慮應於各墓之旁買田地令看墳人自耕自食其餘資留爲祭祀歲修諸用至看墳人必買成房夫婦令其永遠看管慎勿交賣墳地之原主看守也又城中宗祠亦應速辦并買義田擇人專管酌立規條具呈請詳立案用垂久遠俾祠中祭獻之資永無缺之而闔族中有貧不能自給者皆得藉以養生是我祖宗一本之子孫久久永無凍餒乃所以仰報祖宗積德回天轉衰復盛流澤後人之實行也我子孫當共念祖宗之德體余圖報之心奉此力行乃無愧孝子慈孫繼志追遠之意也乾隆壬寅仲春安齋書於恒陽郡署



從伯父問源公諱濶字安齋一字待潮校長公之子也幼孤事母至孝長  
幕遊方敏恪公督畿輔以北河需員奏公名以從九用補武清縣主簿歷  
獻縣知縣務關保定天津同知正定知府通永道清河道淀河溢魚葦課  
附以災請

純皇帝東巡詢災賑各事

上面諭曰魚葦皆利於水何以爲災奏曰水小則魚聚於塘葦出水面民獲其利  
水大則魚溢四出無能網取又葦沒水底無能刈穫是以報災

上大喜曰朱濶頗似方觀承嗣後盧課得以災請自此始也五署臬司有宗族涉  
訟者必諭之曰人之一家猶身之四體豈可戕旁體而自以爲安乎公政  
績甚夥詳墓誌銘中尤篤於族戚依以舉炊者數十家按時有例給之費  
嘗謂子孫曰族姓雖有親疎而祖宗視之均是子孫其憐愛之心初無二  
致苟能養贍宗族卽所以仰答祖宗又云一飯之德不忘厚意可師睚眦  
之怨必報未免狹量不可學也又愛舊聯但願眼前生意滿須知世上苦

待潮集跋

人多二語鑄玉佩之著待潮存稿待潮雜識歷官紀要嘉慶丙辰卒於北  
門橋居安里年七十二葬紅馬羣子六紹曾景曾續曾顯曾述曾丞曾今  
梓公詩一卷附訓子帖於後烏道光庚子正月從姪緒曾謹跋



倦遊集

金陵朱濬見虞撰

武解元魯維肅墓

上新河有古墓土人掘地出碣余往視之乃魯維肅墓本前明武科解元泮官坊題名有其人好事者輾轉附會訛爲吳魯肅墓按太平寰宇記丹徒縣魯肅墓則不在金陵明矣

景純葬金山又云後湖腹步兵死陳留或云鳳臺麓古蹟半無稽附會輒耳熟魯子冠武科實本東國族命名子敬同殘別碑可讀謬言指困賢丹靑駭流俗橫江舊廟靈孫陵雲鬱郁英風誰能攀膺託母乃贖予豈好辨哉攷古思往復更上馬鞍山一證呂忠肅陳將呂忠肅與隋將軍馬鞍山在巫峽宋人訛爲魯肅謂卽金陵馬鞍山建康志力辨之金陵瑣事已有魯肅墓之說近人又附會之余作此詩後再過其地遍尋其碣已無存矣

出神策門掃墓

掃墓侵晨起攜兒出北門路長談柳巷山遠隔花村不盡松楸感難酬鞠育恩

倦遊集

生而甘菽水沒豈責雞豚

三十初度

落拓難將壯志酬驚心三十已當頭空憐襟肘貧如季無復才名藉比歐此日萍蓬瀛海夢曩年風雨秣陵舟羈棲客子雄懷減何事依人作遠遊

過宏恩寺

霜裏森森古寺雄隱然樓閣往來中嗟今我共雞鳴起知此僧猶蜨夢融門待推敲惟有月鈴傳消息但通風曉寒最是天將曙暫近曇光醉月紅

冬日正定道中

南去北來休未休冷風專力刺單裘柳經霜後無青眼蘆爲寒催易白頭入世幾番迷向往計歸何事更夷猶最憐老矣風塵慣惟有榮懷稚子愁特賢子隨侍南歸

落梅

不隨桃李鬪繁華野店山橋自著花莫向笛中怨飄泊芳聲畢竟播天涯

本草紀同自序



紀記也史本紀司馬貞曰本其事而記之謂之紀濬何人斯生平無可紀之善  
年老作經錄紀同數十卷問其人曰秣陵寒士及壯始博青衫一領貧甚無以  
自存一與文戰遂廢舉業糊口於滇南冀北之間性無他嗜雅好談醫惟臃腫  
卷曲多不中匠氏之繩墨亦能自好儋石之儲卽與筆墨爲緣又恥科第無名  
凡詩文詞賦稿成輒焚曰毋竊附儒林貽大方家笑但取本經別錄以及諸名  
家本草所收之藥逐物紀之名其集曰紀同業未卒而之楚嘉慶壬申六十有  
六歲矣檢書竒得原稿一束草部之藥亦未備紀其錯簡殘缺處更多曰傷哉  
貧也舉業之廢廢於貧籠中之物抑廢于貧乎今夫詩賦文章非譽重詞垣不  
足以鼓吹休明而言爲人重所以生平凡有所作稿不敢存借可藏拙若討論  
者不過終軍之鼠爭獻者野老之芹馬勃牛溲不得比繡虎雕龍之價又何必  
稿成輒焚不爲以拭爲楹者資其考證腹猶果然爰將舊稿之錯簡處正之殘  
缺處補之上自神農下及近代共得草部之藥六百五十餘種儘先告成以完  
初願其木部金石與蟲魚菜穀等部亦次第紀其十之九仍其舊名曰紀同或

倦遊集

二

者曰禮毋勦說毋雷同紀事者不能陳言之務去而言與人同曷若不紀之爲  
愈濬曰然是集所紀各藥之形狀不能以鹿爲馬也因物付物猶恐不二如之  
何不同所紀之氣味不能以熱爲寒小苦爲甘也如之何不同所紀各藥之功  
用菖陽引年不能進以稀苓也立異鳴高而不得如之何不同不異之謂同古  
今草木金石蟲魚菜穀等物本不相同然不有物不同而名同者乎不有名不  
同而功用同者乎不有功用與名全不同而亦可同焉者乎同則紀其同焉可  
矣紀其同正可見其大有不同者在矣故曰紀同今予以了不異人之謂同人  
云亦云曷若不紀之爲愈則是與我有同心應并紀之請以自娛悅毋公諸同  
人也可秣陵見虞氏朱濬自序

朱氏宗傳自序

傳也者傳也人不可沒事有足傳古之人焉其所絕不相涉者尙殷殷者爲之  
立傳以傳其人與事而況人關一本大而事業功名小而一技一藝與夫生平  
卒葬子女妻妾之類苟不假諸事墨以書于旣卒之後則將有傳有不傳且或



至于湮沒不傳傳可不立乎哉濬今年六十有一矣始祖紫山公之世若此其遠也耳聞祖父伯叔之言目覩諸兄弟姪輩之行事若此其衆也父諸當吾世何可以不文辭耶爰自紫山公以下或本諸舊聞或書所目覩凡蓋棺論定者各立一傳一人一傳自我坊之後人因之庶幾乎既沒之人不至湮沒不傳然傳疑不敢也卽如紫山公移家來金陵或以魏璫誅求之急公卒免于難而濬未嘗聞公之所以免于魏璫也姑略之不敢傳疑也然傳訛亦不敢也卽如某公某妣有生平卒葬之無可考者直書之豈無人言之互異也亦略之以訛傳訛不敢也則凡傳中僅舉其人或備錄其生平之事亦或無事之可傳皆傳信也後之人必有善屬文者爲某立傳宜準此志毋以富麗爲工可也後之人必有不能文者爲某立傳毋廢此志辭以違意可也作立傳總序

朱氏宗支傳例

一是傳乃爲既歿之人記其生前大略使後世之人知其代有某公有某一事或何時卒於何日葬於何地故生平卒葬從詳餘俱從略又爲支派源流而作

卷遊集

三

也故云從詳女從略乃一家之言也以家人道事故文只責夫通順句亦不尙詞華凡歿者稱公元繼配稱妣殤不稱公尊長傳卑幼不稱公妾存歿稱氏一人而生數子無嫡庶出之分者長稱某公之長子次稱某公之第幾子凡庶出者稱某公之第幾子妾某氏之所出凡有繼配者亦如之凡過繼之子書某公之繼子某妣之所出婦人先夫而歿者生年卒葬附書於傳後後于夫而歿者附生年於夫後婦不立傳下殤不立傳其人無關於宗支者不立傳婦人貴者稱爵餘稱孀人

從伯父見虞公諱濬封三公之子也大興籍庠生公雄於詩文偕從子紹

曾遊滇楚詞翰極富多散失生平酷嗜醫術有神效輯本草紀同脈法集

成自謂精力畢於此書又著朱氏宗支傳五卷嘉慶丁丑年卒年七十一

葬神策門外上元門岡子慶曾鳴曾泰曾啟曾道光庚子春二月從姪緒

曾謹跋



居敬集

金陵朱漣文若撰

寄張斗堂詩

直道遭衆忌低顏復自傷那堪一寸心化作九迴腸饑寒不足羞兒女何能忘  
兒女何能忘先求辟穀方辟穀得仙去得與鸞鶴翔  
豪家願歲長貧家願歲促歲長一日得增一日歡歲促一日免管一日粟一日  
之粟能幾何不及豪家一尺穀蕭條景况變屢新朝餅罄今在陳在陳亦是  
尋常事且自題詩贈遠人

題張雪鴻表兄村莊春曉圖

月落星稀人乍行隣雞喔喔兩三聲莫嗟織婦機中坐早有農夫隴上耕  
老翁送客短籬邊穉子呼爺也欲前紅到桃花青到柳風光處處可人憐

杏花春雪

瓊瑤飄灑綴枝新一夜蛾眉老卻人空想紅歌山店酒竟無香贈畫樓春柳絲  
居敬集

低拂真同瘦燕子重來亦愴神分付多情莫吹笛深閨容易怨芳辰

秋夜

殘暑閉門減空庭夜氣清涼風慰余意漸漸坐邊生

送車湘漁妹倩之山左

江水無情促去舟涼風拂拂正新秋他時快意歸須早霜雪從來易上頭

從伯父文若公諱漣一字居敬臯聞公次子也幼從舅氏車繩遠學性仁  
厚訥於言里黨稱爲長者嘉慶癸亥卒年五十八葬清風鄉子維曾綬曾  
裕曾以綬曾出嗣漸東公諱溶後從子續曾官甘肅通判 馳贈承德郎  
道光庚子春正月從姪緒曾謹跋



題家訓後

欲識修身本須從孝弟推莫輕言語近卽此聖賢基爲政由家法成人始少儀  
危哉嚴敬肆跬步必深思

戒子

閉戶潛修保令名莫教馳騫博虛聲才華半爲騎矜損學問多從謹厚成樹得  
雨滋能長養月無雲翳見光明文章根柢宜尋繹下筆翻瀾漫自鳴

七十述懷

白雪盈頭鬢髮新頓驚七十就衰身半生自笑無長策一諾從來怕負人折簡  
懶隨棋酒樂藏書思濟子孫貧家風幸賴先型在耕讀惟期守樸淳

勤箴

農情必饑女怠必寒勞心勞力配壽晏安

楹書集

儉箴

惟奢僭分惟侈生淫薄我口體厚我身心

慎箴

才肆則狂情縱則溢口守金緘身持玉律

厚箴

匿人之短揚人之長有怨必釋有德不忘

廉箴

谿壑難盈腴削何益欲淡心腴利濃道瘠

讓箴

氣競召侮智角生嫌人心思順天道好謙

敬箴

戲言德潰妄動形殘斂爾鬻笑飭爾衣冠

信箴



以禮交人以義定約一諾不移九原可作

家訓

一家之中父得其為父子得其為子夫婦兄弟各如其分姑媳妯娌各順其理  
童孺勿令驕縱婢僕勿用狡黠讀書雖貧必無越禮之事擁貲雖富易生不肖  
之心業無大小身勤則必成財無多寡義取則能久宗族以性相洽無此界而  
彼疆親戚以禮往來勿爭長而競短敬禮師儒嚴憚所以成器尊執友比匪  
卽以斂形詭諛之聲不聞於閨闈奇巧之物不設於庭除婚姻勿尚侈靡要在  
和順相安喪葬勿事喧譁要在誠敬必竭婦女不許輕出盟饋宜修子弟不許  
閒遊灑掃宜慎酒食致訟恐口體之多危博奕耗神懼身命之或隕少儀內則  
必熟誦而講明俚曲盲詞必深惡而痛絕勿狎倡優致有玷於素履勿招僧道  
致蠱惑於異端暮舞朝歌非保家之善策布衣蔬食乃守分之常經見人勢赫  
勿妄生其攀援見人金多勿遽動其歆羨濟人之危雖損已而弗懈賤人之利  
雖肥已而弗為量出入則用不匱不致逋負之加思終始則行不虧不致尤悔

禮書集

之集處學校勿競虛聲居鄉里勿營小利名有重於科第而富貴為輕利莫薄  
於金銀而陰德為厚勿謂一念可縱念念以名教自防勿謂一時可寬時時以  
身家自愛天下之理不出於戶庭堯舜之道不外乎孝弟我子孫其慎之哉

記聞

吾家以禮法相傳吾少侍伯父希賢公不命坐不敢坐也吾從兄安齋自直隸  
歸里其長子紹曾官知府次子續曾官通判盛夏時皆衣冠侍側安齋兄謙客  
兩子旁立行酒進羹飯終席惟謹其僕人皆立戶外

吾外大父吳岷川公上元廩生有文名舅仲鸞者為業沒無後墓在太平門外

櫻桃園

吾父出遊直隸家無儻石吾母紡績度日嘗天雨斷炊鄰媪以所棄菜根來餉  
母謝受之俟鄰媪去曰菜根可飽然人之所棄不可食也仍送鄰家牆隔鄰媪  
歎服次日伯父希賢公亦歎異

虛偽者多咎質實者多功謹小慎微可以遠害



先君子錦江公少困苦年八歲時祖父雲圃公出遊直隸依祖母以居嘗  
絕炊及祖母卒益困伯父安齋公察其謹篤資以贖易族中孀居三人令  
以餘息贍養之四十餘年無渝志祖父雲圃公晚年歸承志色養極誠敬  
雲圃公愛園居特置別墅於城北凡雲圃公之所契不惜竭貲以助之故  
雲圃公年八十康強考終人皆羨其福厚也先君子生平勤儉言出必信  
不損人以利己宗族友朋多倚仗之婚姻喪葬尤喜濟人不飲酒博奕延  
師教子至恭且敬其陰德事不欲表見於人故不悉載生平不多為詩喜  
讀爾雅論語晚年課孫作家訓一篇子孫當世守之也公生乾隆乙酉  
卒道光丁酉年七十三葬太平門外紅馬臺雲圃公墓之右下  
子緒曾道光壬午舉人今官浙江知縣孫楷桂模桂渠桂植道光庚子  
春三月男緒曾謹識

楹書集跋



秋蟲

豈獨桐彫葉蟲聲已報秋幽懷頻欲訴清韻渺難求感爾非常苦增余無限愁  
挑燈渾不寐獨坐數更籌

病中哭祥兒

本是階前樹如何忽折之春風纔五日絕命已長辭病人難成泪心傷只自悲  
青山今葬玉強借哭為詩

黃菊

何事金精色最明由來壽客應長庚重重淺素塗宮額淡淡輕黃綴夕英羅袂  
飄時三徑冷茶烟影裏一枝橫讓他紅紫先搖落晚節長留萬古名

白菊

但着霓裳不計年枝枝爭放傲霜天光迷玉砌凝晨露色混珠簾帶晚烟此日

葛覃集

堪稱招飲答前身應是廣寒仙莫嫌淨質秋容淡縞素亭亭倍可憐

小軒

軒齋新葺好追歡我得瀟瀟竹數竿最愛月華臨戶牖雅宜花影上闌干室雖  
窄小藏書富人為清癯怯歲寒閒坐焚香消永晝心安時即是身安

憶梅

巡簷幾遍到牆東清味何人得許同峭拆由來憑傲骨吹噓端不借東風水晶  
簾外春無語碧玉峰前夢可通紙帳憶君形影瘦吟魂消盡月明中

閨中即事

繡戶低垂一院香喃喃紫燕話雕梁生憎窗外瀟瀟雨不種芭蕉種海棠  
惜花

侵晨呼婢捲銀鈎幾度尋香繞畫樓昨夜東風昨夜雨為花擔盡十分愁

從姑母諱蘭阜文安公女孫燦西公女也適廩生汪鼂嘉慶丙寅卒年未

三十子祥天女適上元廩生方先甲道光庚子春三月從姪緒曾謹跋



朱魯門先生華峰集詩序

古

攸

陳

圭

撰

吾楚方伯魯門先生性嗜詩公餘不廢吟詠圭聞而慕之連年視食岳陽今春歸長沙始以秋水山房拙集請政先生旋入

覬赴都及見令孫晴溪詩文鏗本益信其家學淵源往來贈答遂申殊契秋月奉檄赴沅州府學晴溪餞於衙齋贈言龍行乃出先生華峰詩集屬爲弁言幽窗登舟匝月水程息心玩索朝夕斯手不能釋凡經過之處殘秋風物朝嵐暮烟樵夫牧豎沙鳥風帆與先生往年遊歷所至情景適合而意中所欲言者安得如先生之工也若夫上危灘穿石窟凌飛濤雷轟鼉吼舟中人皆心神震動讀先生藟茲嶮巖區履之自夷曠二語亦遂恬安之乃嘆曰是詩也殆將移我情矣因思我

朝氣運隆厚百七十年名卿大夫鉅製鴻篇類皆和其聲以鳴國家之盛而有志之士或搜討異書攜摭奇字錯綜成章以博宏富揣山色於深雲密霧中焉

華峰集詩序

知華峰之高鬱蒼森秀崧人心目如是故至於事關國計民生忠厚悱惻其言藹如則自六詔三晉皖城以至吾楚一也圭淺人言之爲足爲先生重然得附名其上藉茲編以傳於無窮是則私心所竊幸者爰書之以爲海內詩人樹之嘉慶十七年歲次壬申小春月



華峰集卷一

金陵朱紹曾魯門撰

春郊得雪

漠漠郊原寒霏落春雪五出捲輕風續紛散林葉木李未著花掖絮飄玉屑  
蜨翅亂以飛鶯聲轉復歇去年燕冀南冬澤時偶越天公叱玉龍施手補無缺  
隴畝沃禾根隰原靖蟲孽芴簷聚穰穰奔走紛笑悅得知腰鎌時坻積觀困麥  
翠華駐江鄉春色正林列 天子省春耕膏漏嚴穴惟天恤下土惠民同  
一轍我欲問廣寒披雲出素月照耀澈九垓對此雙皎潔更開千林花芳菲紅  
紫綴素綯兩相宜瀛洲春萬疊

鴻門

勝廣初發難中原爭逐鹿三戶能亡秦楚仇知必復惜哉項梁死何羽勇無術  
先入王關中天心已有屬鴻門計已危樊侯語空促徒聞碎玉斗終見烏江辱  
題舒怡亭小照

華峰集卷一

昆海倦遨遊淮山願歸老五斗羞折腰襟懷何浩浩歸來三十載頭白顏逾好  
幽竹寫清風林花抒麗藻長嘯復長吟高情寄雲表時後有奇方慵向時人道  
拄杖欲何之尋仙躡蓬島會拍洪厓肩金樽共傾倒

食瓢兒菜分賦

用東坡元修菜韻

名蔬出鄉園踴地冬苜苢盈畦黝以綠小瓢圓而豐播種秋雨餘晚發老圃中  
蒨短攢蠟蕊葉疥書雕蟲朔雪未覆地採掇何怱怱荷擔入里閭日食充簋饌  
調以玉版筍却彼水晶葱清芬溢齒頰下箸何辭空燕薊異風景土脈塵沙叢  
珠漿與瓊酪入口未覺融黃芽最珍脆臭味將毋同我別故鄉久憶年甫成童  
北風屬肌骨鄉思時繫胸故園知荒蕪霜雪歲常封客從故鄉來遣我千里菘  
膾葷忽如失一洗心之蓬得此味不厭斯亦情所鍾願言時雨暘遠謝園圃翁  
瓦橋夜月與張雲汀諸同人分賦用少陵清華宮韻

雄州峙燕南自古橋號瓦長烟空千里皓月碧水下幾曲隄柳青萬頃急湍瀉  
人語寂無聲天籟正瀟灑蒼狗浮雲改世事看儘假子今鎖清流憶昔馳駢馬



英雄泡影空掬月不盈把鷗鷺自安眠誰是忘情者

落齒

余年三十有二忽脫一齒攬鏡低徊不自知其傷之何至援筆率爾成篇子昂燕市感遇徒殷李廣侯封數奇堪歎言非稱老敢藉口於解嘲壯不如人空傷懷於遲暮云爾

朝來落一齒心惻不己人生八歲齠八八始衰耳余年甫及半搖落遽若此少壯惜蹉跎日月逝如矢轉瞬成古今淚下不可紀五陵華冑兒垂髮紆金紫瀛洲悉英奇青年掌柱史嗟余百不能虛此七尺矣縱使齒牙全荏苒伊何底丈夫貴自立浩歎空爲爾

雪後遊萬春山用昌黎人日城南登高韻

春雪覆四郊春山晴乍弄不信曉寒輕未解東風凍孤光炯翠崖幽景良足用策馬快前驅請爲先生從攜壺并挈榼小飲歡聲共銀屏匝地開玉屑驚颺送清分北郭梅冷壓平湖葑蕀馭促歸期輪蹄控復縱暮容淡遠村絲韉何倥偬

華峰集卷一

迴首玉煙平月明雲影重

淇水橋

淇源有淵源源清莫可測長橋練影橫翻作奔濤急雲門懸瀑布飛流捲白石不竭亦不涸湛清終始一君子有貞修川流固不息維彼衛武公千載仰遺跡耄期不倦勤洵哉君子德

納溪石明府三灘壑瀟詩

石君名峰字天心號丹崖滇之趙州人納溪當岷瀘交匯繼梁三灘最險惡丹崖令三年獲入百四十餘軀棺而瘞之春秋設祭碣語詩說成映聞余粗解四聲展轉寄詩屬和踵韻報之

讀書志濟時吏久日以削民生且已矣死者况不作斯民父母吾吾胞非郭郭枯骨詎有知仁心九淵絡繼梁三死所摧舟風噴擗捐撇一不戒閃屍投絕壑眼中所同舟共命畢一落蛟螭血於牙鳥鳶孰落繳吁嗟化爲魚至死逢不若去年渡江陽虎臂愁肉弱虎臂灣險難也天涯急流人可進不可却汝斃各何



山豈坐客游惡八百四千軀誅弔空吟嚼古人通幽明孜孜以善樂蜡氏掌除  
骹厲祭慰飄泊招具該四方情至道非廓廣漢與射聲勅葬誼病燥千秋新故  
鬼煩冤轉扑躍常歎腐儒官尺寸苦律縛事苟在得爲五斗不爲薄斂汝顛連  
魂飢以慈氏酪謂是盡人子生死我歸著所傷碑如林詩文亦星爛誰起衣笞  
徒一訊江神虐我思割乖龍岷山鏟重嶸苛政猛於灘神禹難可鑿安得賢牧  
宰溝中胥有託嗚呼天柱公頌聲達勞莫漢書勞莫數侵犯勞深  
靡莫漢王當羌族屬也

鎮雄道中酬崇尺遺士錫刺史

步山必陟巔層雲極高望涉水必探源奔流徒浩蕩平生磊落想氣阻麻陽舫  
竭來昆明隅憩足神初王鎮雄界川黔復此羅星上籃輿躡峻谷秦莽列屏障  
屈曲蛇赴壑傾欹舟鷗浪危崖孽斷港詭異莫可狀冠蓋有高賢新詩破蠻瘴  
山川貯腹竒探喉疑發藏藹茲險巖區履之自夷曠雄談鑠今古相期觀所向  
我愧俗塵淹翰墨絕魔障膾炙拾餘芳土羹不可餉感君深惠好狂言時一放  
秋蟬咽寒林曲磴聲空壯何當長嘯來一洗山靈謫

華峰集卷一

題聽竹圖

錢湘船少宗伯季女永如許字王杜胥司馬之子利謙未婚而天女爲  
奔喪事舅始撫嗣子課讀有夜來風雪裏聽得竹聲寒之句湘船爲繪

圖囑同人題咏

土恨不能平鴛瓦中分裂月恨不能圓未滿光先缺伉儷情緣慳未婚成永訣  
中道有前因誰歎死易節此生已許字不在襦親結袿拜姑嫜撫嗣心力竭  
蕭蕭勁竹寒皎皎堅冰潔風雪伴孤帷課書恒夜徹清詞寫幽抱即景何淒烈  
阿父繪爲圖遠寄含悲咽題識盡名卿褒貞共傾折琅玕彤管標允矣女中傑

題圖雙峰勒成觀察春霄燒燭圖

草木花甚蕃愛者各有屬定惠留孤芳鬣蘇爲青目因之薦金盤繼以燒銀燭  
名賢一品題千秋有餘馥雙峰玉堂仙繡衣出問俗黃州寄幽情摘豔寫清淑  
將毋憶舊時燃藜向天祿瑞鵲噪枝頭嘉樹紛郁郁要知寄託深別自有歸宿  
豈惟玩物華相憐伴幽獨志士惜分陰予懷歎焉觸繼晷且焚膏乘時若相勗



放眼衡山巔遊心湘水曲禾苗正青葱蘭芷盡綠緜欣欣俱向榮罔不藉陶育  
願垂霽月光洞將萬慮曠

小馬行已亥在威寧作

烏蒙天馬多名駒蹄高跪促能馳驅不施羈勒抑何壯驕嘶直欲衝雲衢世無  
伯樂焉知馬金鞍玉轡材俱下陰血交作張脈興一日千里無乃假斯臾竭蹶  
不復馳翻身莫惜錦障泥始知相肉不相骨鶩駘騷驥還同噉

送呂仲篤秀才歸洛陽

獻縣作

我逢仲子萬春中意投傾蓋神先融文章磊落氣蕭爽餘力技事亦復工彈丸  
幾點落飛鳥戲墨一潑驚雲龍平生樸直不雕鑿詩狂酒渴海天空長安卿相  
多年少洛陽才子何龍從祇今策馬賦歸去 上林努力乘春風

桃園見二色菊中黃外白和崇尺遺韻

霜天旅鴈呼其儔黃花晚發香盈邱故園佳色輕拋置猥來萬里恣遨遊危巒  
登戒隕越羞荆榛夾道心孔曼荒陬有菊挺異質隨機自放如虛舟自是仙葩

華峰集卷一

四

第一流玉盤金蕊光休休琅玕芝草日爭豔蠻鄉隱秀將何求崇君嗜奇詩思  
湧採供筍興秋色重長途載詠空復情無端鄉思怵乎動落英可餐心事違丹  
成黃白何時歸神仙羽化亦幻術黃冠道士鶴擎衣

羅星渡賦贈崇尺遺用杜韻

西川綺縠誇天孫羅星渡接天漢門明河浮槎不可上支機異石今猶存馬揚  
文章迥絕人千年壁壘張前軍寧州刺史今之傑夢吐白鳳筆凌雲弱冠斬馬  
頭角見壯懷射策登金殿霜刃發輒宰黔州巖疆異俗爭革面緬夷空奮螳臂  
車西戎早定天山箭古州有苗黠不馴運籌小試屈不戰升猷謁帝乘花驄奚  
囊襍被來時同偶思鱸尊乞休假謾讓林下生清風大才詎令淹谿壑東山復  
起來滇中能幡拂拭領繁劇政成妙手還空空鎮雄據蜀江上星津轉運車  
屢向五丁移置徑誰開馬蹄欲渡色惆悵先生履險自如夷新詩卓犖窮殊相  
胸中碗礪何時消放眼川雲齊得喪論交有道文有神伐毛洗髓存其真浣花  
老人晚入蜀性耽佳句常驚人讀殘萬卷行萬里官清形羸腹不貧天章鏤錯



重什襲哀然著述等於身

題友人蘭竹畫軸

蘭眼啼露依巒村竹中不醉三郎魂披圖尺幅見手澤坐使瘴癘消晨昏當日  
趨庭楚天潤花花葉葉開芳園蘭如子弟竹留客生氣噴薄春光溫試熟名香  
展妙墨不知夕靄移朝暾百年家具到剡溪何必豸豸節非蓬門我識君家有傳  
視蘭心竹實徒空言攜琴彈取郢高曲繪事今日珍彝樽

追涼詩

有序

丙戌夏侯起叔先生作追涼詩廿首時和者張雲汀江望亭及予與弟  
序之共六人得首一百首極一時之盛哀爲集梁松垞敘焉閱今七年  
矣子素不存稿茲於篋中得殘稿五首姑存之嗣當於師門索全集以  
誌盛事予與弟詩皆師命賦今二十首題圖在也情詩句零落不復全

記耳

何處追涼好涼生綠綺中七絃調夜月萬壑響松風指落湘雲暗音寒石澗通

華峰集卷一

五

向來笙笛耳一洗俗塵空

何處追涼好涼生讀書中寒山懸夜雨古樹老秋風坐對雲疑溼神遊徑已通  
月明如何掇清鶴下高空

何處追涼好涼生荷蓀中一肩鳩竹杖十畝稻花風樹影沿溪踏樵歌隔嶺通

歸來茅舍晚山靄翠橫空

何處追涼好涼生牧犢中山腰深避日牛背穩迎風繞樹平疇接環溪小徑通

閒眠吹短笛隨意破晴空

何處追涼好涼生夜院中香清花墜露竹響葉梢風蛩語閒階寂螢光暗牖通

悠然欣所遇天淡暮雲空

瑞芝

澶州王東亭牧伯入觀而署中廊下生芝甚夥其朔沈漁村爲徵詩故結語及之

鳧履趨螭陛仙芝出粉廊夜光凝碧檻紫氣靄青箱北闕恩殊渥南山頌  
引長餘輝成宅相合榜瑞芝堂

重慶江北蒙子園看梅



爲踐尋梅約臨江預報期莫嫌歸棹晚偏值放衙遲忙裏饒清興尊前動遠思  
遠軒三百樹不羨嶺頭奇

題梅花主人小照

幽谷生春草園梅競吐芳平橋低覆水絳雪暗凝香繞屋皆成趣巡檐更舉觴

玉堂清品貴主人年八旬嘉樹壽而臧

感通寺謁楊升庵遺像

議禮人何在遺蹤異代留感通今有寺寫韻舊名樓樓在寺中錦水傳清響蒼山紀  
勝遊白頭歸未得鴉髻足風流

溫泉

天生橋畔路三度往來過巨石排青案溫泉湧碧波蕩胸開久鬱刮垢起沈疴  
未卜民財早先看解慍多

諫果一名餘甘子

好是餘甘子銀盤羨乍登無慚名諫果猶自帶堅冰脆滋味彌永香寒美倍增

華峰集卷一

六

夜來清茗熟評向讀書燈

送舒怡亭之任滇南二律

知君壯志弭金貂一命榮分萬里遙敢爲南天辭僕僕曾經楚雨詠瀟瀟龍江  
浪湧盤千尺玉筍峰高上九霄惠政山川歌並美笑看飛鏃貫雙鴟

柳拂行旌快此回征鞍一據壯懷開七年始奮雲霄翼萬里還同夜月杯定有  
功名酬夙願從知造物鍊奇才碧雞金馬天風便好寄驚人謝句來

和陳使君韻

春風整日臥塵輜雅度欣逢霧乍披好句朝飛驚響過劇談夜永覺情移已看  
金石撞龍鼎會有文章入鳳池惆悵星軺攀不住長橋官柳意遲遲

丁酉重陽前夕

小院疎窗夜雨過秋聲入耳太紛拏空憐鷹隼風塵老不信鷓鴣道路賒情幻  
乍醒千日酒夢回猶憶五雲車由來瓠落知無用又見東籬菊有華

文章千古重知音得失無憑是寸心萬卷摩娑悲簡齋卅年蹉跌嘆書淫名非



沒世情難已事到關心淚不禁莫訝君苗焚筆硯落花重和瘞文吟

翁時庵秀才話棲霞景出詩索和棲霞金陵勝地也予生其間未獲往見

爰就所聞走筆和韻用以志向往之忱云爾

攝山幽構話難窮石磴雲階接蕊宮飛閣千尋凌霧表驚濤一氣滾江東珍珠泉瀉春流碧紗帽峰籠夕照紅何日遂初歸去好臨沂重問布帆風

赴滇容序之弟送別

丈夫有淚不輕揮骨月何堪萬里違故我依然幾脫略自茲遠矣一歎歎敢云祿養娛親志乍為名途別子聞報最歸來應共約不教久負老萊衣時弟亦分發待缺

邯鄲

築馬鳴過學步橋重關係障勢凌霄簡襄世遠雄圖吞廉藺風微意氣銷膾有美人工鼓瑟更聞隣女解吹簫月明何處尋賓飲魯酒無因破寂寥

邯鄲道中自勵

碧雞金馬盡王程小試長風萬里行芳草總縈遊子夢飛花時觸故園情三山

華峰集卷一

七

路迥雲連望六詔民淳政尚平莫厭清貧忘故步不貪為寶即榮名

九日招集諸同人東山寺登高

蓬萊宮闕海雲東萬里澄清景物同爽氣直凌丹徼外秋光常駐翠微中寒烟拂水波瀾綠老樹經霜葉正紅九日由來誇盛事登高一嘯倚長風

壺公道術幻難求古寺層樓境亦幽雙嶺豁雲霧萬千家刈獲稻梁稠朋儕偶喜酬佳節民事須知重有秋試向高臺舒遠望何如烟雨遶清遊

主賓高會羨滕王斗閣凌霄頓氣涼放眼莫愁窮地軸拈花微笑識天香誰揮玉塵爭分席休厭金壘醉興鄉山外白雲雲外樹朗吟應不礙清狂

憶將書劍遠從軍戊申安南之役奉檄隨營總理糧臺至宣光曾歷南交踏瘴氛布幄夜經天外雨

牙旗朝破嶺頭雲豹韜辛已藏高閣鳳岫依然對夕曛聞道菊英堪駐景擬開

三徑學徵君

次和金東園政南見贈原韻

一殿靈光六詔南底須搖落悵江潭故人才地清如鶴處士聲華靳若驂無那



停雲懷折柳儘容遲日聽攜柑好來重拜龐公座爲我頻開蔣徑三

湯陰謁岳忠武祠恭和

御製詩碑原韻

古樹蕭森武穆祠誰將三字獄成之萬千赤子攀轅日十二金牌奉詔時只有  
寸衷深自信不因孤掌恨難支傷心更過宗留守痛飲黃龍未有期

將入都門留別魯甸紳耆一律有序

予分判烏蒙忽忽三載慚無善政宜民歲癸卯得代士民爲遮道立碑

辭不獲已爰留詩誌別以答其意

三年匏繫向遐荒保障勲名未自量但喜民風胥渾噩莫言官況太尋常君山  
藏富源應遠姑海澄波澤共長小別不須頻悵望京門萬里被恩光  
君山

俱魯甸山水

余由湘藩蒙

恩內召晉秩太常紳士以詩文贈行累至百數十幅因

賦二律各以誌別

衡嶽棲遲漫六年驪歌乍唱意潸然自慚衰朽恩榮重幸接清華雨露偏柳絮

華峰集卷一

八

有情深惜別棠陰無愛可留傳三湘江上風帆穩笑看琳瑯載滿船

碧桃紅杏倚蓬萊惆悵當年布鼓雷不信七旬容易老由來三楚最多才吟成

白雪高難和記取青雲氣莫頽花滿長安春正暖金門歧望好追陪

喜雨

雲捲霞飛洗太清朝曦雨後倍晶瑩簾前燕語喧新霽柳外蟬聲噪午晴四野  
鋤烟翻草碧萬川浴日映沙平喜看山翠搖書幌別樣風光照眼明

謁獻王陵

漢洗周秦敝靈鍾孫子賢惟王尋墜緒紹聖接薪傳朱邸開文苑青衿抱簡編  
搜羅窮匱室招納徧山川功著六經久心周奕世前實田紛學術毛貫輔精研

時祀隆今古流風映後先日華芳館麗樂壽故封延雅樂虛高塚豐碑表舊阡

萬春訕含秀傑百草劓鬱青辛黃帝衣冠香淮南雞犬仙陵存神未遠瞻拜肅

雕筵

蘆薦



湘浦寒雲重蕭蕭鴈陣秋一聲驚夜雨飛度葦花洲

水月梅

池邊瓊樹初開海上水輪正駕爲尋鏡裏幽香只在月明林下

邯鄲祠

眞疑是幻幻疑眞千古名韞幾困人爲問黃梁何日熟不妨夢裏閱長春  
男兒生愧不成名應識名成卽夢成信有先生能早覺也從夢後始心平  
仙祠小憩拂征塵多少癡人說夢頻萬里勞勞君莫笑夢中事業亦前因

時赴滇南

再題升庵像

升庵放逐晚年爲粉面雙鴉髻坐籃輿以自恣

禮成興獻臣何損痛哭陳詞亦愛君粉面籃輿空自譴點蒼山靄氣凌雲

乙卯過韓侯嶺題廟壁

解衣推食漢恩隆垓下功成命亦終高鳥良弓君早識不須遺恨未央宮  
三分割據勢方成不肯乘危聽蒯生誰道異謀興末路君侯心跡自分明

華峰集卷一

九

巍巍陵廟枕山邱道路人猶說項劉賸有英名今不朽相君原只合封侯

宿燕子硎

時自安南旋師

硎門深鎖暮雲飛冒雨尋幽夜扣扉屏燭莫嫌驚燕寢好傳清夢到江磯

危垣曲磴幾盤旋老樹凌雲偃蓋圓自笑吾生如坐井杳然別見井中天

洞中有圓

隙上透光有樹覆其頂如蓋

萬斛泉聲萬馬馳洞中泉聲澎湃壯心驚起出關時兵向安南丈夫不具封侯骨燕領

還貽肉食嗤

烏衣巷口是吾家小別於今幾歲華不信宣光安南地歸路遠却憐燕子客天涯

喃喃細雨似留人天朗雲輕正晚春馬首不須重顧盼倚門萬里是雙親

中秋看杏花

誰道秋高獨桂香杏林柘月吐春芳須知自有回天術不是山經誌怪章  
特歎仙萼向秋陽笑立郊原映水光不與桃花同冷落詎容丹桂獨猖狂  
時移物換再休論紅杏偷開玉露辰只爲芳姿多屬意故教秋報午橋春



秋日尋春興致賒潞河西畔賞奇葩矯然開向沙灘地疑是來從董奉家  
平林瞻眺細尋思春艷偏舒秋判時露冷風清誰是伴長隄疎柳一絲絲  
重陽舟中對菊

佳節黃花插滿頭載將秋色上蘭舟布帆無恙詩情遠臨水登山興共幽  
輕舟盡日坐花叢色較秋光別樣濃不是幽人誇富貴由來隱逸擅奇蹤  
霜枝臨水見精神燕紫鶯黃色色勻莫嘆西風多落莫秋花爛漫却勝春  
兩槳輕搖花四圍金風占斷百花魁夜深若作羅浮夢應有高人待月來  
風來面面颯然秋細殺紋開夜櫂柔誰道月明空滿載清光如許不勝收

魯甸道中口號

烏蒙二月好春風桃李花開雪未融農爲地寒先火褥滿山野燒月明中  
十月過沙棠哨見山寺桂花正開仿長慶體一截

人間十月秋花盡山寺凌冬桂正開若共嶺梅商位置也應分占小春來

九日永豐軍中感懷

華峰集卷一

余羈身軍旅父喪未奔母老莫養撫時增感漫爾成吟亦不自知其詞

費云

驚心節序倍思親戎馬誰憐墨經身死別吞聲生缺養不堪爲子曷爲人  
秋霜鏡裏不勝悲夢遠鄉關心事岐此日北堂應有淚呼天無語更思兒  
屢歲從軍日未遑余丙辰帶兵勦辦威遠禦黑盛夏漳鄉今年留滇禦苗復奉調救拔黔之捧鮮瘴鄉歸去又蠻鄉書  
生何有平戎策忍捨親闈事戰場

感承舊德難圖報重沐

新恩未易償

余以捧鮮解圍奉旨加臬銜

好是頑苗今已格殺

弓不礙整歸裝

雙塘

會川南去是雙塘抖擻征衣渡野航隔岸馬嘶河畔路繫情何止柳絲長

渡汨羅江投詩禱雨

望歲偏逢旱魃噴汨羅江上泣靈均忠魂若尚憐鄉土願沛甘霖惠此民

岳陽道中喜雨二截



憶自來時憂旱爨曾經禱雨荷靈施於今述職匆匆去又值田間望澤時  
慚無惠政報 天家苗穉心驚正自嗟何幸崇朝慰農望貪天功說雨隨車

道中復見二色芍有懷景尺遺刺史

菊花香老鴈聲秋并繼羅星記共遊今日花開驚隔歲馬蹄猶滯蜀山陬  
金仙飛墮白蓮舟好句如仙幾唱酬別久故人應見憶一枝秋色正夷猶

華峰集卷一

七



金仙飛墮白蓮舟好句如仙幾唱酬別久故人應見憶一枝秋色正夷猶  
新自來時憂旱爨曾經禱雨荷靈施於今述職匆匆去又值田間望澤時  
慚無惠政報 天家苗穉心驚正自嗟何幸崇朝慰農望貪天功說雨隨車



金陵朱紹曾魯門撰

恭紀 聖訓

嘉慶九年二月二十一日至

圓明園次早

聖駕至玉泉山道旁跪請

聖安後隨蒙

召見奉

上諭山西地方諸事俱妥就是刑名亦無要案大約民情儉樸還肯急公不過重利好鬪不致有邪教等事巡撫在任年久辦事謹慎妥協藩司係翰林出身人甚明白現在倉庫無虧又無災賑是第一好省分隨一覆

奏均係恪遵

聖訓辦理連年秋收豐稔地方靜謐又奉

華峰集卷二

諭旨垂詢年歲及在直在晉年分均卽覆

奏奉

諭旨汝住幾日自候送駕隨奏請隨侍前往蒙

恩諭可以不必汝這幾日總來見可也仰覩

天顏和霽二十四日面奉

聖訓臬司職在明刑當以民命爲重易於積善亦易造孽務要持平問重罪固宜慎重卽流徒各罪亦不可大意致有冤抑總不可預存成見又不是一味從寬將兇犯故爲開脫漏網以爲行善使死者含冤彼將不問兇手轉怨問官不是積善直造一孽矣至律無正條比引辦理之案更易於輕重尤須斟酌妥協總要審度和平欽此仰承

聖訓周詳愷惻反復曉諭寔爲刑名標準時敬兢聽謹畧約恭紀以爲遵守

重建順寧府育賢館碑

順寧育賢館者



國朝開滇之初太守米三岳璠之所建三岳爲米太僕萬鍾之從孫貴州巡撫米忠毅公壽圖之子太僕以善書與董宗伯齊名謂之邢張米董以不附魏瑞爲其黨所劾削籍忠毅以新鄉令爲南京御史其論張若祺謝陞楊嗣昌陳睿林欽諸疏爲當時推重其大者在劾馬士英阮大鍼爲其黨所忌出按四川爲貴州巡撫於沅州死難三岳於順治十六年隨大軍入滇守順寧初建此館聚生徒興文育教延麗農山人陳璠以主之山人乃故明之部曹遁跡於此者著育賢館志後來順寧魏志卽原本於此書而郡之人士蒸蒸日起皆三岳與山人之遺澤也子家金陵時聞故老道南都時事慕米御史之風及守順寧見育賢館志與遺老所傳聞歎太守當軍務倥傯能以餘力振興文教此其視忠毅之令新鄉率吏民破走土寇濬衛川作養人材先後一轍忠臣循吏世濟其美真前事之師也至求館之所在百餘年來荒烟蔓草猶徘徊不忍去豈非地以人重歟前志稱太守以順治十七年建此館康熙二年卽拂衣歸所置館田無人經營多爲民間侵佔七年後郡守許宏勳以田給歸原主迨克平吳逆後郡

華峰集卷二

二

守郎廷極徐僱遞爲增修四十三年乃改爲學署旋又追取田銀歸學建署原館雖廢餼不能充裕而原館猶存其地在府署之西北隅至乾隆辛巳年後改爲縣倉坊額移置東門南隅其地湫隘並無房廡爲營丁養馬之區嗟呼馬隊非講肆不動陶公之詞哉余來守是邦擇府署之南學宮餘墟地勢高阜爽塏軒豁後山擁鳳前山對鳳梧桐朝陽風氣四會中啟講堂以間計者三以楹計者十有二又前爲門顏故館額於其上檐宇翹起規模壯濶間計楹計亦如堂內有三室深邃通明室前兩廂各三厨廡并闕不具備館成因述建置之由與米太守家世以文章忠節炳耀丹青太守妙年出守早歲拂衣其出也甘棠勿剪其處也松菊未荒高風亮節可無述而志乎太守爲此館記云十室必有忠信何地無才不借才於異地何時無才嘗三復此言而慨然順寧至明萬厯始改土歸流崇正戊辰郡人龔和梅彞於吾鄉劉若宰榜登進士官副使提玉尺掌文衡何地無才不其然乎副使遭亂離後曾爲觀插詩寄太守云幾年搔首想承平今日逢君湖水清擊楫西南嗟半壁登樓談笑拱長城訟庭飛鳥閒



來往沃野耕牛狎雨晴莫道治成無可象農謨到處見民情此詩與記載於館志而今隄志以記屬之許宏勳蓋隄志鈔稿得之耶徐二守二守作隄時宏勳再至渾爲臬使故以此館歸功於宏勳耳永昌王尙書宏祚曾兩爲壽言以頌太守想亦心折於忠毅而幸太守之能發揮先業麗農山人以譚友夏之賞音猶赴嘉招而盡心於講學况太守解組後僑寓吾鄉猶吾鄉之先輩子承乏茲郡太守又爲守土之前輩其視千里間風官輟殊途者固大相懸遠矣高山不遠仰止維殷并告後之人使知育賢之義爭自濯磨以副我國家培養人才之重意則又區區之心所企而望者固不惟以修輯遺跡如古之所云有舉無廢也是爲記

順寧府題名碑記

府之堂側舊有題名碑蓋自乾隆年間新鄭劉公後未有記者余於戊申秋攝郡事旋有安南軍旅之役馳驅於安邊宣光間軍旋辦理報銷留省匝歲庚戌邀補回任次年以引

華峰集卷二

三

見入都癸丑夏再回郡因委辦案件駐省經年乙卯夏又以伴送緬甸貢使入都歲底回郡至丙辰二月陞任迤東於四月二十六日卸篆余在順九載多趨事於碧雞金馬中間一奉軍務兩入

帝都統計在郡者僅十餘月雖遠勝於五日京兆而虛名無補徒費歲時則予之愧也適續纂郡乘稍摛輯尙未有成自顧無可記述吏以題名請爰敘其任卸月日自劉君後書以付之若夫蒐羅文獻補前人之所未及以貽後來猶有待焉而余以風塵匆遽自道已事不欲強爲粉飾固拙者之所爲也是爲記

移建育賢館記

順寧故蒲蠻地也向爲猛姓土司世守明萬厯間始歸流官自是聲教稍通我朝定鼎初米公聰來守是邦建育賢館於北城之內聚生徒講習延麗農山人陳璠爲山長而郡之人士欣然向學皆米太守之力也米公爲故明黔撫忠毅公壽圖之子忠毅先爲南京御史彈劾馬士英阮大鍼直聲振朝野子家江寧少聞父老言心竊敬慕之而未悉其家世求其後人亦不可得乾隆戊申冬承



之茲郡閱志乘始知米公爲忠毅公之子自幸生平之所仰慕者地隔數千里外人在數百年前一旦得於宦轍所至步武前型雖不同時而能同守其爲附驥固無異也公於戎馬倥偬力興文教非有志趣過人又能秉承家學者豈能有若是之展布然則予於忠毅益不能已於嚮往矣育賢館久遷於城東湫溢曠圯蕪爲秣馬之場學宮後有餘墟地勢爽塏謀欲遷之時知事權縣篆魯山王君炎欣然同心與余首捐廉俸倡率邑之紳士共勦厥成前建門樓顏舊額於其上次講堂三間次內室三間兩廂八間最後爲聖閣旁列厨室俾士子栖止而給饗殮焉起於庚戌秋迄辛亥夏計糜金若干落成同人請記於余余不敢沒諸君之善列其姓名於左且誌米公之舊德於不忘并告後之學者整飭身心以希賢爲歸而主講席者亦講道論德不徒以詞章爲事吾見棧樸菁莪之化當見於此邦豈不美哉是爲記

石丹崖三灘義塚記

士君子以仁爲心不必求諸高遠於目之所及力之所能行之無倦卽聖賢其

華峰集卷二

四

址吾於丹崖得師焉丹崖學富性醇循循不自矜尚一心以惠民濟物爲已任納溪邑小訟簡久且無訟丹崖乃日進民而詢其疾苦民求之於丹崖若子之於父母無不應其求丹崖復推好生之心爲恤死之舉此三灘義冢所由設也蜀江之險甲天下而三灘爲入江門戶沉骸溺骨浮聚於灘之左右者歲不下千餘軀丹崖募水手於灘側拯溺如不及拯之無濟者則爲之衿槨收而瘞之數年來塚以數千計纍纍相望慮其政之久而弛也復捐俸置地勒石陳規用垂久遠昔富鄭公葬遺骸爲大塚曰叢鄉此其遺意也丹崖澤及枯骨如斯其如生者更當何如吾知丹崖愛民之心出諸至性宜乎納之民愛之如慈父母焉卽目之所及力之所能擴而充之所謂聖賢心愛之學非歟是知仁政不在求諸高遠吾過三灘至納邑而益信爰爲之記云

署西春秋閣碑記

關廟之祀通乎天下楚省府州縣各有專祠亦有祠於署內者藩署西隅爲之廟而以春秋閣名之明乎其爲永鎮蔽垣不以武廟名也前汪陞晉撫成甯始



其事陞學撫韓對踵而新之并將案庫二神聯祠分祀工竣前任聯擢封疆丕昭瑞應神若有以陰翊之余承之以來欽承

恩命屢議撫篆閣境清平各書吏乞余一言以彰靈貺以垂久遠案神爲掌案牘之神閣後東隅有祠向者各房分祀香燭燈燼恐或不謹改建閣之隙地合爲一祠庫神先祠於庫內收建於庫外與案神相聯卽與閣並峙夫閣之名春秋也誠以春秋大義炳如日星

關帝扶炎正氣申大義於吳魏紛爭之日千載下凜凜如生於赫在上秩祀明禋賴神之靈佑我南國卽案與庫亦邀其護庇先是嘉慶十年孟夏鳩工至仲冬告竣僅八閱月克底於成此工程之不速而成也有樓有臺有堂有室有修廡有過棚鑿堅材良運覺接宇翬飛鳥革翼翼沈沈耀以寶聯題以金額鐘磬爐瓶罔或缺略是分職尼事之有條不紊也豆籩簠簋有定則司啟閉者有工食毋歲檢蓋罅漏丹雘墻壁有經費是董事之善後事宜旣詳且悉也各書吏協力捐助自爲踴躍用緡一千有奇其留存二百餘緡乃備公用此衆擎易舉

華峰集卷二

五

又能措置得法有成功而無煩費也余旣詳書始末將前任創始良意告之無窮於各書吏急公趨事亦及之書畢復爲之說曰余蒞任楚南三載矣雨暘時若屢歲大豐四境安謐民怵於野寔荷

神貺吾未敢或忘各書當亦恪守舊章勤供厥職毋曠公事毋蹈愆尤以迓神祥是又余禱祝之私拳拳無已者也是爲記

軍中偶記

火器爲今日軍中最要雖資育之勇萬不能當一小礮子然亦有時不中用者須看其形勢地利行之往時督兵征裸黑至山箐見賊多伏大樹或石旁設弩以待鎗發中其樹或石子不能穿而彼還自樹旁石隙發弩我兵卽多爲所中又賊眾徧山漫野不拘數目隨處散布並無紀律遇官兵施放鎗砲一見舉火俱卽於山凹處仰臥貼地手中搬所持之弩扣弦搭箭一俟鎗砲子過卽應聲發弩其弩鏃或竹或骨或鐵皆施毒其銳傷人甚烈又鳥鎗利於攻守而於追亡逐北頗多不便今以一鎗兵所配帶計之鎗一刀一鉛藥九龍袋發藥筒及



裹帶乾糧至少不下三十餘觔賊敗必走險岩仄徑我兵肩鎗勝刀以一身配帶起而往遂斷不能及賊只有看其奔逃卽勇者奮而追逐亦不能及空身人之輕捷是以往往戰勝而賊逃職是故也余嘗閱前人兵法五人爲伍每伍有一火兵余謂今之鎗兵當依法行之如每伍設火兵一名五兵皆持火鎗其火兵則惟備一刀背負五長矛並各兵多備之鉛藥以聽取用一遇賊敗五人卽將火鎗俱付火兵收管各持一矛而往旣輕且捷較之負重逐賊其功可倍此法卽用隨帶之餘丁行之火兵亦不須外募如未備餘丁者則臨時於五人中不妨留一人收管火鎗四人輕身而出亦無不可在相機應變耳

一兵須訓練有素尤在將弁相習投之所向乃可如意往往有左營兵派右弁帶碩右營兵派左將帶往素非相習多不見功且有躲避以及寔在奮勇者俱不能辨識不可不知也

一兵法無他只是心齊耳書曰受有臣億萬爲億萬心有臣三千爲一心此周之所以勝殷也兵無多寡人人一心向敵主帥加以謀略不患無成也

華峰集卷二

六

一號令旌旗當以簡明爲要進退坐止須聽金鼓其約束不可不嚴今之用兵雖不必如古人所云布陣約期而扼險設伏必不可少若不知備惟恃人多砲利冒昧而行無益也又畏縮觀望之徒皆由不明兵法不知大義全在督兵者賞罰嚴明三令五申使之奮興最爲切要

一兵不可以預言如指東擊西說退轉進全在臨時措置卽如說明日進兵而今日適有機卽連夜前行不必拘執又如明日說進兵而適遇雨雪及他疑慮又不能泥一說也大約兵以氣勝一鼓作氣全在將能馭之兵法避其朝銳擊其情歸良有以也我欲守彼不知其所戰我欲戰彼不知其所守唐太宗語李靖所謂孫子千章萬句惟致人而不致於人也

書生抱殘守缺拘文牽義不可以言兵然非讀書窮理人斷不能知兵古之名將未有不讀書者韓昌黎云士不通經果不足用余謂用兵尤信若守城全在心齊勇生於義在司事者平時之化臨事以身先之且動之以誠無不應也至以少擊衆莫妙於設伏在善用之



庚午科武鄉試錄序

洪惟我

國家重熙累洽久道化成所以

嘉惠人材者遐邇無遺卽至邊壤苗疆無不有勇知方足備干城之選

皇上御極之十有五年歲次庚午舉行文武鄉試先是秋八月文闈將竣湖南

巡撫臣景安前赴粵東查辦事件於二十六日起程臣欽奉

恩命護理撫篆文闈事竣繼以武闈臣敬謹將事同監射官長沙協副將張觀

文及司道等進學臣李宗瀚錄送武生八百餘名於城東教場先試騎射地毬

次步箭次技勇悉心遴選密記好字號准入內場越日率同提調監試局闈試

以武經默寫一段於交卷時核其人才齊力取中二十四名如額敬彙錄全錄

恭呈

御覽臣例得颺言簡端竊惟文武兩科所以造士而備

國家之器使也我

華峰集卷二

七

皇上誕敷

文德載績

武功

大化薰蒸英俊早裕於庠序奇才特拔健銳備集於賓興自唐虞以來梗頑不

化之苗人現皆興學著藉隆以登進熙熙而來者不異齊民而樸茂有加化行

俗美賢才衆多其登鹿鳴之選者臣既幸襄

盛典於擢臣之後今武場諸生嫻於騎則超乘為雄習於射則中鵠為多裕於

力則扛鼎為能默寫武經亦能心識手錄臣悉心考校矢公矢慎既詳校其技

藝並細察其氣概蒐羅採擇期無負於

掄才至意以儲夫營衛貔虎之用則士氣振而

世運亦日見昌熾此

聖化之隆也臣得藉手以觀人材之盛無任懼忭之至維時官斯土者例得備

書



春秋提要序

春秋魯史也孔子修之以存周史莫魯以周公之裔輔周室也起平王訖敬王  
歷魯十二公隱桓莊閔僖文宣成襄昭定哀是也春秋謹五始元者氣之始春  
者四時之始王者受命之始正月者政教之始也即位者一國之始也周之於  
魯也錫命者三歸脈者一來聘者七魯之事周也君臣朝聘於周者八公於齊  
者十有一如晉者二十如楚者二其大夫之聘於列國者五十有六列國之聘  
於魯也三十有一齊五晉十一宋衛四曠其朝於魯者四十會盟征伐蓋無歲  
無之也凡盟一百有九刑牲插同盟十有六石門於鹹特盟之始終也互屋鄆  
陵參盟之始終也于幽平邱同盟之始終也凡會九十有七潛會之始也黃池  
會之終也潛師掠京者侵也侵國者六十聲罪致討者伐也伐國者二百一十  
有三兩兵相接曰戰戰二十三環其城邑曰圍圍四十四造其國都曰入入二  
十七徒其朝市曰遷遷者十毀其宗廟社稷曰滅滅者二十詭道而勝之曰敗  
敗師十有六悉虜而俘之曰取取師三取國邑者十有六輕行而掩之曰襲襲

華峰集卷二

八

一已去而攝之曰追追二殊盟二講武二獻捷二降二降者脅服之詞也聚兵  
而守之曰戍戍三望三蒸嘗三王人三命大夫三人自爲盟三以一國而用諸  
侯之師者三以者以弱假強而能左右之也狩四潰四泄四盟殊會四兵車之  
會四蒐五平五和而不平乞師五來盟五外大夫聘而遂盟五獲六凡君戰而死  
曰滅生禽曰獲大夫生死皆曰獲來七遇七築八郊九而牛傷者四下違者四  
大不敬者一土田十衣裳之會十有一次師十有三雩二十有一救二十有三  
城二十有九執三十有一凡災異一百二十有二春秋五霸謂齊桓晉文秦穆  
宋襄楚莊也五伯莫盛於桓文桓公九合諸侯北杏兩鄆兩于榿于貫陽穀  
首止甯母葵邱衣裳之會也于洮于鹹牡邱于淮兵車之會也晉文之五書爵  
也曰侵曹曰代衛曰入曹曰城濮而其尤著者踐土踐土之會以臣召君非禮  
也書曰天王狩于河陽聖經嚴大防也三置晉君一救荆禍不替孟明公秦穆  
之績也入陳而復之服鄭而許之不築京觀楚莊王之行也惟彼宋襄其無足  
紀焉晉襄公退三強敗狄伐許而敗秦子殺遂爲秦晉七十二年兵爭之始追



乎晉悼五會雞澤于戚救陳于鄆邢邱思復文公之業而三駕代鄭遂以服楚  
功亦偉矣晉平七合諸侯曰溴梁祝阿澶淵商任沙隨兩夷儀是也其五合大  
夫則兩于澶淵于宋于虢城杞是也猶霸王之餘業歟自是而往三桓秉魯  
陳氏奪齊六卿分晉政逮大夫陵夷殆日甚焉魯之三桓曰孟孫叔孫季孫公  
子反敗莒于鄆在傳此季孫之始也公孫茲侵陳在傳此叔孫之始也公孫敖  
救徐在傳此孟孫之始也晉之八卿智荀荀偃韓起欒黶士匄士魴魏絳趙  
武也其繼爲六卿曰趙氏范氏智氏荀氏魏氏韓氏追范氏智氏中行氏滅而  
韓趙魏三卿遂以鼎立頡頏諸侯春秋後乃爲列國較三桓其有過之矣議者  
謂春秋莫大於尊周而攘外而制楚之師得失有七前有召陵以義勝也城濮  
以威勝也鄆陵以幸勝也蕭魚以善勝也于泓以不度德不量力而敗也于邲  
以將不用命而敗也後之召陵荀寅以求貨弗得而還也孟子曰春秋無義戰  
彼善於此則有之矣聖人據事直書而其義自見故美惡不嫌同詞二百四十  
二年之間是非予奪於今可見者其在斯歟春秋列國見於年表者十九魯蔡

華峰集卷二

九

曹衛滕晉鄭齊秦楚宋杞陳吳莒薛小邾是也蘇氏曰春秋之國見於經傳者  
一百二十四國云

嘉慶元年夏六月奉委勦捕威遠驪屬牛肩山野黑紀略序

雲南夷獮種類甚繁自涵濡

聖澤向化日久各安耕鑿內有獮黑一種隸沿邊土司服役勤苦者是爲熟獮  
黑惟野獮黑僑寄山巔罔知耕稼持鏢弩捕鳥獸爲食遇飢寒輒潛赴村落竊  
夷塞稻梁牛馬追捕則竄入深山捷如飛鳥不可得其素爲邊擾如此嘉慶丙  
辰歲春夏之交威遠屬野獮黑山中乏食羣起攘奪先是孫署丞甫莅威未嘗  
察情事或張大其詞鎮道邊帥兵弁土練往捕獮黑聚千餘人乃入牛肩山據  
之此山崇巖峻嶺林樹叢雜賊分布於岩澗深處兵練不識徑稍近山輒擊傷  
土弁刀文龍因被害鎮道上聞請兵勦捕余時觀察巡東奉江撫軍命往撫邛  
卽調督兵練以靖邊陲一切便宜從事六月下澣自省啟行值炎雨泥濘載道  
由彌度以南至景東恩樂鎮沅一帶多僻徑尤險阻此路向無臺站亟飭有司



設捷足馳送文報先令幹員馳往安郵被奪夷民示諭裸匪投首免罪訪察中  
有漢奸亟反間以散其黨七月望前余至抱母將抵威矣孫大使等來告裸黑  
間風知懼願獻兇魁歸誠余以化外愚夷迫於窮困既知畏懼可貸生路乃回  
駐抱母相機而行豈知裸性頑梗搶掠如故卽會商迤南吳觀察暨各鎮調集  
官兵分駐隘口招撫夷民歸田護守秋禾尤防裸匪搶割遣勇練游巡勦殺思  
茅沙練猛戛土弁等先後擒賊殺斃多人稍知斂迹惟山路進步益險峻非勇  
敢慣行能耐瘴厲者不敢往旋續調耿馬猛猛小猛裔六困等練數千分圍牛  
山示以兵威更三令五宣招使來歸終思有以矜全之而威遠一帶水土劣惡  
烟瘴逼人馬大病又大雨時行官兵不能深入七月杪勒制軍專摺入

告奉

旨勦辦江撫軍蘇軍門各札會於秋中來威商略進勦余乃審察地勢并繪圖  
一紙其中凡安營用炮設伏之處及應用兵練若干人均一一詳載送撫軍進  
呈八月望間探聞緬寧接壤猛猛打鵲山聚有裸飛調黃守備防守知會各營

華峰集卷二

十

以兵應之隨派各練分防要路遣嚮導探看入山路徑備行糧撓牌火器爲進  
攻之用時撫軍欲用練挑戰以試其鋒余亟阻止蓋兵練未齊冒昧從事關繫  
正非淺鮮其出諸務叢集議論紛紜余任勞任怨必期籌畫萬全乃愁病交加  
忽染鼻衄出血升餘猶不能不力疾支持也九月初已定進攻之期又復大雨  
數日遲至重陽後始晴霽會商提鎮入山立營共計官兵二千餘人外調土練  
三千四百餘人均雲集九月十日景谷汎地獲奸細札儀提鎮帶兵至猛麻分  
布各練於白沙坡等營裸匪來撲阿忝將奮勇率小崑崙練接仗殺賊明目小  
猛裔召邁進逼牛泥塘會集官兵直赴牛肩山燒毀賊營我兵進山詎十四日  
風雨大作賊匪於山後潛迓兵練尾追殺斃割獻不計禽獲無數嗣聞賊勢散  
人稀偷渡南洋河迤至蠻穩亟傳諭南線一帶各裸不許入裸飭兵練追圍不  
與接仗密致各提鎮圍繞不任其困鬪嚴密以防其遠遁再繪圖送撫軍照各  
要隘分途堵禦官兵尾隨接應爲犄角之勢十月初匪黨求降陽爲懇請終遲  
疑不出旋復連日進兵賊分路抵敵是其來設之語終不可恃也十六日密寄



撫軍并及各提鎮信我兵數倍於賊難還攻之殊非良計且賊負固竟得以退  
藏休息不如用連環陣法分兵練班次後先輪攻以分其勢以困其力或時夾  
攻或夜劫寨使彼刻刻無寧應接不暇賊疲於奔命不患其不來歸矣提鎮如  
計進攻隨經各練擒獻殺斃昆波四寨頭目乃紛紛出投又囑各鎮勦中窩撫  
不徒以殺傷爲事十月下泮各路兵練圍繞追尋又擒多賊究札那兇魁已身  
死投出男婦五百餘人撫軍奏捷奉

旨議敘出力文武以示獎勵是役也倉卒用兵一無籌備全賴撫綏益資彈壓  
而兵練初集軍興之費難以預定章程且僚屬意見參差偵騎雲馳忙無所措  
維時余惴惴臨深外雖戎馬倥忽惟以鎮靜處之凡調兵督餉設防謀戰及行  
糧軍器獎賞犒勞一切事宜思有良策急列數事達之上官施行而往來馳驟  
力盡神疲又自夏徂秋炎蒸濕熱厲結蠻烟毒生瘴雨以致積勞染疾失血頭  
眩軍中並無藥無醫亦危矣哉幸仰賴

皇上天威遠振將帥宣猷兵練用命間參機宜倖中兵法乃遂長驅直入一掃

華峰集卷二

二

薤白<sub>華</sub>麼胥靖蠻寨風清自九月初十日行兵至十月二十五日猓黑平竊惟  
盡心

王事臣子之職也好謀而成用兵之道也余愧疎庸從事戎行惟一時不敢稍  
懈一事不敢稍忽以期吹鞭息警飛檄罷傳用昭

威德之敷無負臣下之職爰爲紀其顛末以誌一時之馳驅云爾

太湖周偶樵琴品序

余自束髮愛書十歲成制藝就童子試卽喜吟咏寫景書懷多不存稿嗣隨先  
大夫官署於風月吟誦之餘偶及音律最喜習琴搵縵安絃頗有心得年來奔  
走風塵未有安息此事幾廢間一操弄而手生荆棘矣茲里居闕漁西琴品廿  
四則思超象表悟人會中不覺神授色與冷然移情爰弁數言以誌夙好

扶雅堂詩集序

長孫<sub>照</sub>隨任讀書一日余見其手抄鏡帆詩草并附以追和詩余喜其讀書  
之暇留心吟詠而又淵源外家頗有合乎敦本親親之誼若其和詩則未之有



得也。鍊帆爲余兒女姻家。歷任煩劇。以循績著。詩能自寫性真。在香山眉山之間。惜天嗇其年。詩不多見。其存者又未免散軼。搜而輯之。付之梓人。存詩卽以存鍊帆。附以和詩。亦以存鍊帆也。言念往者。延佇多時。撫卷流連。情烏能已。

和蟬吟自序

余以眊矇。焚筆硯。雅不欲再以詩文質人。用是絕口者有日。已亥秋。奉差黔蜀道中。與崇尺遺刺。史連轡。山陬雨夕。風晨劇談。忘倦。若鍼石之引。莫之能解。尺遺工詩數。授贈。因復拈管。酬答。所謂秋樹寒蟬。時復一鳴也。自茲恐不無詞費。云。因鳴秋蟬吟。

跋胡曉江九日舟中宴集賦

涼飈薦爽。九日偏狂。客路驚秋。寸心如醉。去鄉闕而漸遠。壺公縮地。莫慰相思。對秋水之孔長。陶令採花。徒存虛願。野蔬供小飲。杯傳桑落之遺。畫舫泊孤汀。景泛湖山之勝。何當好句。不負良辰。玉屑飛來。金聲乍擲。開芙蓉之幕。我愧非賢。抒藻績之才。客皆上選。歌傳白紵。恍疑身作翠微。瘦比黃花。更許香留晚節。

華峰集卷二

五

未應老去漫爾悲秋。及此壯猷。休言投筆。鷹管方將前席。待朗吟。莫厭酒杯寬。

三叔祖大有公七十壽序

嘉慶辛未仲冬中澣。三叔祖大有公七十初度。鄉黨六親咸重。公之德爲公壽。余時陳藩楚南。未獲偕羣。從拜獻一卮。而公之生平知之最悉。固不能已於言。公爲叔。曾祖景略。公之幼子。生而穎悟。讀書工小楷。英氣豪邁。不屑事咕嗶章句。賦質強有力。喜拳勇。欄騎射。戚友掖之。就童子試。可操券獲售。而公以中的者。必長跪報名。恥之。乃去。而北遊。至先清河。公署司書。號會計。在署人多亟亟。功名而公獨重道義。毅然自立。不肯隨俗。委蛇舉凡。睦宗族。急友朋。嘉言善行。不能殫述。而公大端尤敦於孝友。先是景略公仕於楚。攜楊氏歸。侍老。楊固樸質。不得小姑歡。乃迫而遣之。守墓。楊固無些芥愆。尤也。公爲楊氏所出。幼時不知及壯間。端末涕泣咨訪。二十年始得其踪跡。公亟匍匐往。迓相向。大慟而楊母已垂白。皤然鄉間。老婦矣。時公之考妣早歿。乃迎楊歸。侍備極孝。養顧念母族。無人未敢以私恩承祧。乃爲另立養子。以嗣其後。生事葬祭。終始克補。不匱。



之心迄今楊氏歿已廿年矣公言之猶泣數行下也公事長兄封三公追隨几杖受教惟謹有責難從容請益不敢稍拂意見亦愛之逾諸昆胞姪之子鳳保襁褓失恃公撫之勝如已出保抱攜持無微不至有乳母所不能及者及長教之讀詩書學貨殖以至於成立姪亦敬之逾諸父公之子錦江孝友敦倫待人誠信幼習商賈爲六陳行先清河公愛其質直遺以貲本俾濟族中之困乏者今事益富厚能以甘旨博親歡其照瞻族中俱如先清河公約數十年未嘗稍改公之教也公之孫甫九齡極聰俊授以四子書輒熟誦授以爾雅諸書俱能熟誦其成就未可量也公含飴分甘顧而樂之因思景略公積德累行雖身膺民社未嘗顯於名途追篤生我叔祖克振寒門願以英邁之姿不求宦達自少而壯而老惟是性好懿德誼崇忠厚可謂天爵有餘人倫盡美善矣他日列鼎鳴鐘高大吾門閭者非公之子孫而何茲介杖國之年值黃鐘之月芳芝生而柔荔出獻頌稱鴈蘭芝繞膝詢知世德相承身名俱泰矣 敬述家風備陳庸德亦以敦百行者重於家庭知內美者歸於宗族遙瞻桑梓之雪敬效松柏之

華峰集卷二

三

祝云爾是爲序

姨母項太孺人陳老太君壽序

嘗聞坤之爲德也其體則貞靜而有恒其用則振載而弗隕故壺儀之吉協乎坤德之符者莫不翔洽四宜履綏百福順爲邦國鄉黨之所稱述焉茲於我姨母項太孺人陳老太君乃親見而深信之矣太孺人系出潁川家傳詩禮奕世簪纓爲江鄉望族余外大父佩青公本膠庠名宿教育英才多所成就舅氏劍南公早領鄉薦爲宗里所共推太孺人爲外大父仲女余母同胞姊也幼嫻內則貞淑端凝外大父母尤極愛憐擇配惟謹年二十甫適我姨丈獻廷公爲繼室姨丈才優品重世德相延舉案交莊雞鳴共警方期鵬搏扶搖鸞膠永固不意年二十外遽赴玉樓之台青雲見阻白首難期我姨母太孺人矢志守貞茹荼嚼蘖和睦戚族摺持家務撫育前子及所生辛勤備至我中表昆季滙川東州克自樹立鄉國有聲皆太孺人之教也滙川輩早入國子學例得晉紆青紫秉性清幽怡情市隱共敦孝弟養志營闈教子課孫備天倫樂事太孺人家孫



絳弱冠卽已採芹雖暫困棘闈而積厚流光定臻遠到况今孫曾繞膝玉樹森森其足光前緒而酌母德者方來未艾矧見

紫語榮膺

鸞章載錫不獨以節壽仰承

旌典也前已酉歲爲太孺人七秩誕辰先大夫時方秉臬畿封手製序文郵寄稱壽已備承梗概矣丙辰值先大夫疇演考終余以軍旅羈身仰仗

天威頑苗咸格感蒙

恩寵紀績加銜得歸故里終制竊見老母與姨母均各康強爲之悲喜交集今年春余弟續曾之子桂植成進士蒙

恩分吏部學習老母顧而樂之謂姨母清操仁厚其文孫當亦即捷步南宮輝映門閭天之所以敷錫貞德者理有必然也余弟續曾已循例赴都起復余亦俟襄入

觀仲冬爲姨母太孺人八旬大慶屆期均不獲登堂雖自顧弗文而誼叨猶子

華峰集卷二

十四

敢繼先大夫敷言製錦之意以申祝嘏之忱行慶期頤尙將爲姨母備序其貞靜振載之德闡明坤道之體用爲世著壹儀標準也是爲序

官先事士先志論

庚寅試贈錄文

且人生有當務之急焉莫不視所居以爲準職業爲吾身之分則纖悉不容以稍疎立身與賢聖爲徒則寸念不敢以自棄天下之出而無負朝廷入而無慚幽獨者其敬慎于當幾龜臯于平素蓋有各盡之分量焉試可舉官先事士先志之說而申論之已今夫事者官之所以爲守也志者士之所以自成也國家之建官授職非徒詔以祿糈榮其身家已也夫亦謂一人之機務紛紜散而寄之百執事之間而有以觀其成也官之所先舍事其何所屬哉若夫士則未嘗出而謀諸事也其皇皇於仁義道德之途者初不必自爲表見也而爾室之操修有獨深於宥密者性情之本而亦學術之原也志其士之所急乎是故靖共爾位共體天工人代之思所守者官則所先者事無敢後也用意不紛猶此修身正心之素自命爲士則不懈其志急所先也事君者以此爲進思之職持身



者以此爲人德之基而觀人者亦以此窺其人之本量焉官與士之所謂有爲有守者蓋俱不越於此矣夫官與士亦思其不知所先耳不知所先則廩祿或以貽素餐之誚而臣節已虧捺持且墮于物欲之私而正氣已奪世之玷官守而不足以爲士者其亦未嘗返而自鑑也使誠知而先之而寅清時凜於夙夜揆存無間於初終將見朝廷之上席績成熙草野之間士無遺行亮天工而歌喜起卽士之隱居求志者且將學古入官而康我庶事焉豈非官與士之所當各盡而國家之所樂覓也哉是在知所先而已矣

### 古宗字法

古宗有三十字頭凡字俱由此出其法如古轉法其字書與看法皆自左達右平列層疊而下其筆用削竹寬如薤葉銳其首醜墨橫書於紙上其用筆先後亦有法分巧拙焉

字另錄

### 覆泗州左明府

學術本疎加以卅年來風塵碌碌益形荒落自笑未讀萬卷書空行萬里路偶

華峰集卷二

五

有著述不過隨所遇言之從不敢存稿自揣寔無可存年久亦多忘却重承賜問勉思塞責

### 擬選舉孝廉詔

百行莫先於孝而立官首重惟廉此士人誠身之本也而國家寔深賴之夫以天下之大人才之衆其純孝本於性成品節勵於鄉里者類不乏人國家養育英才將以正人心而和風俗其令有司與廉舉孝以爲士民事親修身者勸其無所隱

### 祭陶郎中文

嗚呼陶君當代儒宗攬英接秀矜雅揚風委蛇郎署聲譽日隆相期遠大遽罹厥厥凶鵬鳥至止賈生運窮歲非辰已康成告終人琴俱杳親舊悲同惟君先世清風亮節抱道守真貽經傳笏乃祖文章儒林圭臬閩海分符冀黃比績洛社養高者英表式鹿鳴重賦懋膺

龍錫厥考繼武銀艾不絕作牧定差宣威敷歷克篤忠貞再生賢哲惟君天性



孝友溫良棟家幹國身立名彰鴻筆摛藻卓犖輝煌燿燿伯仲元方季方往歲  
丁卯同擢天香寶珠薛鳳姬美聯行芝蘭玉樹繞鄰芬芳敦詩說禮名噪膠庠  
我郡小倉山稱靈秀爰有寓公騷壇頌哀君游其間官商迭奏歌徧旗亭雞林  
傳購農部趨承南宮未售柴翰凝香詩藹益富子美昌黎華寔並茂馳譽分曹  
王前廬後如君推才宜冠瀛洲如君盛年克壯其猷奈何一第夙志難酬位不  
副德忽赴玉樓修短在數身沒名留志潔行廉自足千秋惟我與君情深誼切  
桑梓同游鳶蘿曾結以我少子配君弱息三載來歸克嫗婦職我藩楚南君歸  
兜率湘水幽幽蔣山寂寂華屋生存感嘆疇昔遙酌生芻涕零嗚咽哀哉尚饗

華峰集卷二



從兄魯門公諱紹曾字衣言一字用矩一字贊化安齋公之長子也以國  
學生充方略館謄錄議敘通判厯雲南維西魯甸通判雲南中甸同知順  
寧知府迤東道直隸霸昌道山西按察使安徽湖南布政使太常寺卿兄  
體貌豐偉讀書目下數行博涉子史韜略周牌占候藝術無不研究雲南  
牛肩山野狽搶掠督兵往勦官兵但恃鳥鎗賊多仰臥貼地搬弩俟鎗子  
過發弩傷官兵兄乃每伍設火兵一人司鎗筒其四人空身持矛入箐追  
殺遂破其砦凶魁札那死又廣西苗匪自混水掠師宗自清水逼五槽腹  
背受敵兄乃躬率銳勦黑耳槽羊街之匪大捷復委統兵赴羅平會鶴麗  
鎮德於金雞山分兵三路夾攻復馳回師宗至五洛河魯克槽三鼓乘雨  
進攻破三十餘寨總督勒公保復命解捧鮓之圍於是羅平之魯布革  
江造船乘夜渡江巫據鶯歌嘴山梁要隘且戰且進直抵捧鮓圍立解湖  
南大旱投詩汨羅江明日大雨生平無疾言遽色篤於族戚每歲時四季  
分俸以贍貧乏詩文揮灑立就著有華峰文集滇行日記威遠紀略雜著

華峰集跋

德軒時藝嘉慶乙亥卒年七十二葬紅馬君齋家凹子桂棟桂馨桂樞桂  
樑道光庚子春正月從弟紹曾謹跋



